

OKHALIHIWA AANA ²



Miyo...oxeleliwa vakhani paahi. Kaahikhalana mutthu aari oowali, oowali saana, nto kaahaana paahi orowa okathi yoole, 'okhala wira awo yaari ootakhala, ootakhala saana. Nto keettiha ekaaro kikhumaka oMichigan, mupiliisa khukiihana, ni siiso, okhala wira awo yaari, ootakhala saana. Vano, masi enoorowa okhala saana; sothene—sothene siri soolakiheriwa, vano vaareera. Apwiya yarwa vale, sothene soolakiheriwa nto, kahi siiso? Oh, Awo—Awo t'oreera murima; wuupuwela oreera Waya murima ni omoriwa Waya ikharari, wa etthu Awo anthoonyery'aya wa hiyo, ni moota ottotopeliwa Waya ory'aya wooreerexa.

Ahe, hiyo naaheesa opacerya, niiraka wira nnookuxa ikapiitulu tthaaru soopacerya sa Eliivuru y'aEfeso. Ni kinoona wira hiyo nookhalana moolumo mararu oopacerya, wala *itthu* tthaaru soopacerya mmo. Khinaaphin'ye ottaiwenexa, masi khino ohiy'ula nnoowerya ominyala nrowaka ohoolo vakhani. Vano, kintthuna ohimya wira nkihiyo musomi a Bibilia, mwa inamuna suulupale, ni inamuna suulupale s'okhala teyooloku, masi miyo—miyo kinnaaphenta Apwiya, ni onnikisivela waarumeela Yaawo ni...[Munna mmosa onlavula ni Munna Branham—Mol.]

Mutthu mmosa, ekhumelelo paahi, iirale, vakhani paahi nihinatthi okelela ohoolo vano, mwanamwane mwaamuthiyana oxpirtaali oLouisville, ni atthu othene oosuwela saana muteko aroomuhiya, owo onookhwa vano, ni onvekela mwaha wa mwan'awe. Ntoko aKristu, enninitthuna wuuramiha miru sahu, vano, wira nivekele.

Pwiy'ahu ooreera murima, kahi etthu ennitthuna paahi, masi ti oreeriwa wahu, ni ti wawihu—otthuna wahu wira ninuuramiha miru sahu ohiy'ula ntoko ekereja, ntoko nikhuru n'atthu oowiihaneliwa okhuma, atthu anaamini va ohiy'ula, wira niixuttihe Masu Anyu, annihela voopuroni vahu mw'Erutthuni, memmo nniir'ahu mpantte, ni memmo okhanly'ahu ovaraka muteko voophwanelela vamosa ntoko atthu a Erutthu ya Kristu.

² Nto vano ninniihaneliwa wira nirowe voowaakuva wa Muluku. Ni khula mmosa a hiyo axitiithi nnuupuwela wira, anki ole aakhanle mwan'ihu, moota mirima sahu saarow'aya oniviha ni osikula mwa hiyo, ni hiyo naamuwiihana atthu a mukereja naanaanoru wira evekele. Nto murima wa tiithi mmosa a mutthu onoovihiwa, onoowereya. Pwiya, oMutthu uwo muulupale wa Eroho Yowarya orwe naanaano va vamurimani va titth'uwo. Okumihe khula ohoverya, ni khula ekoyi, ni emusuwelihe wira Nyuwo mwa Muluku ni khiivo hata eretta

enwerya okhala Ohoolo Wanyu okathi oruma Wanyu w'oMuluku onttharihiw'aya ni ekereja Anyu ni atthu Anyu.

³ Ni ntoko moovirani w'esumana, hiyo nivekelaka, okhuma Ettiminku evinre kinnuupuwelaka inamuna iya wala irowelelo iya sa mavekelo. Hiyo khanrina yinci-ene ya kapwitthi ntoko sinooney'aya w'atthu a molumwenkuni, masi pharancikul'ola mwaamukhaani onniiva aavareliwaka ni ikatha sa waamini. O Pwiya, mavekelo ahu ephiye owaani, okhwa iwo onikhala mwa mwanamwan'owo, ni okhale woopwexakasiwa kapattikapatti; epiphi, oriipela, sikhume vooilini va mwanamwan'owo, mwaan'owo wala mwanamwane, mwaamuthiyana. Ni wira Waarya wuulupale wa Mukhalelo wa Muluku waarye vaavo. Akhume oxipiritaali iwe, oryeene mwaana mukumi.

⁴ Muluku, hiyo noosuwela wira epante ekina ya muro ale oophentiwa ahu anoolipelela, ni ti yoovuwa. Masi hiyo ninnaaphenta axikhaani ahu. Ni ninnivekela, Pwiya, wira mwaha w'ovuwa Wanyu, wira Nyuwo mwiinanele ekumi ya mwaan'owo. Hiyo, ntoko ekereja Anyu, ninnoomola okhwa iwo, ni wira, "Mweemele weiwo. khamunwerya omukuxa mwaan'owo, okhala wira hiyo ninnivekela ottikihwa ekumi awe wa omwene wa Muluku." Munivahe itthu iya, Pwiya, wira sirowe silukame nipuro okathi oniroih'ahu, mwa Nsina na Yesu Kristu, Moopoli ahu. Amen.

⁵ Ninnaamini? Miyo nkisuwenle etthu kaarowaaka wira kahaakhanle muKristu. Nkaarowa otthuna okhala okathi munci-ene. Khiivo hat'etthu y'okhalela, woohikhala owoopola akina, t'itthu yoomalela oreera ensuwel'aka.

⁶ Vano, ohiy'ula nintthuna nipacerye paahi mulipiheryo mwaamukhaani wa nisomi nahu nivinre. Kinrowa otthuna osoma, okhala wira, ekapiitulu yothene, kawerya vale ohiy'ula. Vano Ttiminku voosiisu khino kihaana okeliha soopiili Ttiminku voosiisu ni ohiyu, yakhala sana vale, weererya okela mw'etthu ila wa ele kintthun'aka wira ekereja yoone. Oh, ti yoovuwexa ophwanya opuro anyu! Ni khaavo onwerya wira etthu p'itthu ehikhanle wira munosuwela oratteene etthu eniir'anyu.

⁷ Ankhi vaakhanle wira mwaarowa okhala...wooperariwa, nto khukhala tothoro mmiravo onammalaru okhuma oxikola wira owo aarowa...ohinatoko okhalana operasawu khalayi. Onamwi, okhanle-ene mmiravo ni oophwaneliwa, ni maihi awe ooxamuliwa saana, ni owanre-ene saana, vooreerela, ni itthu sothene. Vano owo iirale wira, "Miyo koonona miyaalo, ni koowiiva axikokho mukarumani mothene ni itthu." Masi mwaamukhalana moonelo mwaamukhaani wootikiniha wa yeeyo. Kaamuthanla okhalana tothoro mmosa mutokweene otonko wira operasawu uwo imaara sinci-ene khalayi, kihinatthi otthuna wira kithikiliwe. Miyo—miyo kintthuna kimusuwele

mutthu ohikhumme naanaano oxikola, kimmuthuna mutthu olimalenle.

⁸ Vano Ole oosuwela oratteene miyo ommusuwel'aka, wira nimwiihane ohiy'ula, ti Eroho Yowarya. Owo ti Meetiku muulupale a Muluku ni Mwiiuxtithi muulupale

⁹ Vano kihelaka mulipiheryo wa Mutthak'aka ohiy'ula, nlelo mwa elaleeryo ya Ttiminku, wira eyo e . . . Awo yaahimukhootta Samuweli ni Masu a Apwiya; khimukupali Sawuli, mwaana a Kiixi; nto khimukhootta Samuweli, yoowo aatthoonyerya Eroho Yowarya, okhala wira owo aalavula paahi ntoko Eroho yaamurum'aya olavula. Vano okathi aawiihann'awe wira ewiriyane, owo iirale, "Muupuwele, miyo nkinoohimeeryekeni hat'etthu mwa Nsina n'Apwiya woohikhala wira Apwiya anookhumeleliha. Nnakhala nkinakhalaneke mweettelo woohiloka ohoolo wanyu. Ni khaavo onwerya okihimyana etampi."

Ntoko Yesu iiraly'awe, "T'ani onwerya okihimyana etampi?" Munnona?

¹⁰ Vano owo aahihimya-tho, wira, "Miyo nkinarweeke wa nyuwo wira koovekeleni musurukhu ni sikina. Nkinakuxeke hat'etthu yawinyu. Masi sothene sinihimyaaka sinikhala sa mureerelo anyu, sinooruuhel'akani sikhumme mwaano mwa Apwiya."

¹¹ Ni atthu othene annikhalela onamoona, "Eyo ekeekhaii. Sothene iyo ekeekhaii, masi nlelo nintthuna nikhallane mwene. Hiyo nintthuna nikhale ntoko atthu akina a mulaponi."

¹² Vano, ohiy'ula, Yoolempwa ahu enkawa Eliivuru y'aEfeso, ti Eliivuru ya Yoxuwa a Waataana Wa Naanaano. Eyo enookawa ni waakhaliha oratteene "ale axinttale." Vano, owo mulipiheryo paahi wa minuutu vakhani, wira niphiey nipuro nihinatthi opacerya osoma, opacerya eversiiikulu 3. Vano, hiyo naahiphwanya Ettiminku evinre ohiyu wira e . . . Muluku mwa Waataana Wa Khalayi aahimmanela natiri Isarayeli wa muttethe w'omumula, okhala wira awo yaari anawetta ni aletto. Ni awo yaari muttethe wahaari wawaya, nto Muluku aahimmana natiri mwa Abrahamu wira owo aamukhala mmalapo, osuulu awe waamurowa okhala amalapo iyaakha imiya xexe eriyari y'atthu amalapo, ni yaamurowa ohaaxiwa, masi ni ntata na ikuru Owo aamurowa waakumiha aaroihaka muttethe wooreera waarina eleethi ni oravo.

¹³ Nto, vano, waattamenly'aya okathi wa natiri, Muluku aahinvenxa mutthu wira aakumihe muttethe ole. Akavi musaala mu ohiy'ula aari owo . . . ansuwela aari pani uwo? Moise. Nwehe, ethoonyeryo, yoolikana saana ya Ole awihu ovaheriwe wira anikumihe aniroihaka Muttethe wa natiri, Kristu. Vano hiyo nihaana natiri, 'okhala wira natiri ahu Omumula wa muroohoni, vaavo, wawaya waary'aya omumula w'erutthu.

Nto vano awo jaarwa muttethe mmosa awo yaawery'aya wira, "Ola muttethe ahu, hiyo khanihiyo-tho anamweettasa hiyo nookilaathi, ola muttethe ahu, nto mu hiyo nookhalana omumula. Hiyo nnoomwaala nakhuwo ahu, miri sahu, ni nnimoolya sa mmirini mwahu. Vano nto okathi onkhwaahu, nnimwaahiyerya an'ihu."

¹⁴ Oh, moota naakhanly'ahu ookelaka muttethe wa yeeyo, ikano sa orithi, ntoko Nowemi ni Ruuthi, Bowazi. Ottikiha yothene eyo. Moota munna mmosa wIsarayeli, moota yaatthuney'aya owo... etthu p'itthu yaamupweteiye yaahaana ohokoloxiwa ni mmusi. Oh, moota ereeraly'aya! Yaamukuxa isumana ni isumana ni isumana ni isumana, khinaarowa hata okhuma ekapiitulu ila, wira nikele mwa yeeyo. Naamuwerya omulutta Bibilia othene vaava va, ekapiitulu yeela ela emosa.

¹⁵ Nto, oh, miyo okisivela omusoma Yoowo. Naanimukuxaka n'ukuxa eyaakha ntero ni nuusu, ni khanaahiya hata Eliivuru. Okhala ni Yeeyo pahi.

¹⁶ Vano, masi, yaari etthu emosa yuulupale mpakha yoorithi, moota yaary'aya wira yoorithi mmuttettheni khaavo mutthu mukina woohikhala mmusi aawerya ohokoloxa yoorithi iyo. Vano, mukihye paahi kiruuhe ethoonyeryo yaamukhaani va kaakwanyaly'aka ohiyu umosa, ya nyuwo aximai. Akavi mu mwaavekelenle ale onaaphent'anyu, arimeenle? Vaareera. Eyo vo tho, moone, "Yoorithi anyu." Munnona?

¹⁷ Paulo aahimuhimeerya muRooma, khwira, "Mmwaamini Pwiya Yesu Kristu, vano nyuwo n'etthoko anyu munimoopowa." Mwakhalana waamini oniphiyerya wira nyuwo mmansinyu moopowe, mukhalane waamini oniphiyerya, hata wira mmirav'owo, wala mwali uwo ohiniwelela sayi, awo animoopowa mwa khula enamuna. Muluku, mwa khula enamuna! Vakhala wira Owo ohaana owaatalela ottuli waya, orupaathi iwe muxipiritaali, ekhwaaka, awo animoopowa. Muluku t'ohimnye. Yoorithi! Oh! "Vano awo anoorkhala iwe," ohimnye ti Yesaya, "ni osuulu aya wothene ni yaawo. Khanrowa wiirha yoonanara wala ohonona vamwaako Vaka wothene woowaarya, anihimya t'Apwiya."

¹⁸ Oh, kookhalana nipuro naamukhaani kinroromel'aka wira kinoowerya ophiya ohiy'ula, wa nyuwo. Enooviha mmurimani mwaka paahi, ya eyo entthikela eyo.

¹⁹ Masi vano, nikelele ohoolo. Nto moomuweha Moise, namapaka miirriyrya muulupale ole aamurunhe Isarayeli anvirihaka mmuttettheni, nto khwaaruuha mpakha muttethe wa natiri, masi kaavanhe yoorithi aya? Owo khaavanhe yoorithi aya; owo aarohale mpakha muttethe, masi Yoxuwa t'akawenle muttethe atthu. Eyo ekeekhai? Ni Kristu ooruuha ekereja mpakha nipuro vaavo mureerelo aya apakeliw'aya yaawo, avahiw'aya yaawo, ahaana paahi omulapuwa Yordani, masi

Eroho Yowarya t'Ile enikhaliha ekereja oratteene. Yoxuwa oolelo onikhaliha ekereja oratteene, emuvahaka khula mmosa, soovaha, mapuro, nipuro. Ni Eyo ti Nsu na Muluku ninlavula mwa mutthu a muhina Kristu omoopony'awe, Eroho Yowarya. Vano munniwa yeeyo saana? Vano ninkela muLiivuruni mwa aEfeso. Vano, enamuna emosaru, Owo onikhaliha ekereja voopuroni vaaniir'aya mpannta. Vano, Yoxuwa aahaakhaliha mmuttettheni w'ephattu. Vano Eroho Yowarya enikhaliha ekereja, voopuroni, mmuttettheni, memmo awo, voopuroni awo aniir'aya mpannta, yoorithi aya.

²⁰ Vano, etthu yoopacerya owo onipacery'awe va, owo oniveleliha epaphelo awe, "Paulo." Yeeyo, enrow'ahu osuwela nuumala okathi vakhani wira mwiiriiry'ola wothene uupululeliwe yoowo, kahi oseminaariyu, kahi ni teyooloku, masi waari wuupululiwa w'eMuluku wa Eroho Yowarya Muluku aanvahaly'awe Paulo. Asuwelaka wira mwiiriiry'awa Muluku, owo ohimmy'awe, wira waaipithihiwe okhuma opattuxiwakaru olumwenku, aahuupululeliwa yoowo ni Eroho Yowarya. Nto Eroho Yowarya eriyari y'atthu yaamukhaliha khula mmosa oratteene, yaakhaliha ekereja voopuroni vaya.

²¹ Vano, etthu yoopacerya Paulo onipacery'awe va waaleela atthu, wiiriha wira yothene...Muupuwele, ela ti ya ekereja, kahi w'ale ari ota. Owo mwiiriiry'awa mwa isiiri wa yoowo, khonaweryeke osuwela saana, onimuvira osulu, owo khonsuwela-tho hat'etthu ya yoowo. Masi, wa Ekereja, owo oravo muhina mwa mwala, iwo ohakalala ohinlavuleya, owo nrromelo wooreerhiwa, owo nankura a munepa, iwo p'uroromela wahu ni mukhaliheryo, owo ti Mwala w'Okathi, oh, ti yothene eri yooreera. Maana erimu n'ilapo ya vathi sinoomala, masi Masu a Muluku khammala.

²² Masi mutthu ori ota w'oKanani khonsuwela hat'etthu ya yeeyo, owo nlelo oneettasa pure. Nkinihimya wira kahi mutthu ooreera murima, nkinihimya eyo. Nkinihimya wira mutthu ori w'Ejitu kahi mutthu ooreera murima, masi owo, mpakha akele muhina wa mureerel'ola.

²³ Nto mureerelo ene, wira, natiri ovahiwe ekereja kuhiyo muttethe w'ephattu, masi muttethe wa erooho, maana hiyo na nloko n'anamukuttho oomwene, nloko n'atthu oowaarya. Vano mwa nloko nenla n'anamukuttho oomwene, nloko n'atthu oowaarya, atthu awawe, oowiihaneliwa ota, oothommwa, oothanliwa, oovalaanyiwa, vano olumwenku wothene ti wookhwa ota. Ni nineettihiwa ni Eroho. Aana alopwana n'athiyana a Muluku aneettihiwa ni Eroho ya Muluku; kahi ni mutthu, masi ni Eroho.

²⁴ Othene mwa ophentana, etthu yothene ti yoovitikeleliwa vano. Eheereriwa wiixuttihiwa yeela imaara sinci-ene, ni vekeekhai mateyooloku aalupale aahimya vowiixeryaxa ovikana

saawery'aka. Masi etthu ene miyo entthun'aka wira nvare t'ila, wira mutthu ori mwa Kristu, ni Eroho Yowarya, onniwerya onvilela mutthu owo avonnye-ene, wiisumaaliha, ooreera murima, oovilela. Owo t'osivela, oowiiyeviha, oororomeleya, oosareya Eroho, mnakhala oohikhootta, okathi wothene oowaakhulela. Owo mutthu oovirikana.

²⁵ Kahi mutthu paahi wira, "Hiyo naahinto okhalana. Nakhuwelaru, naahikhalana, hiyo aMetotista. Oh, okathi okhuwenly'ahu, hiyo naari mMuttettheni." Eyo ti yooreera, ti vooreera, miyo kinnaamini yeeyo nave.

²⁶ Nto aPentekosite khurwa elavulaka ilavulelo, awo, "Naahikhalana; atthu othene yaalavula ilavulelo yaahikhalana." Miyo kinnaamini yeeyo, nave. Masi nlelo hiyo khuphwanya wira anci-ene khayaarina Eyo nlelo, moone. Munnona? Vano awo ari. . .

²⁷ Hiyo vano nimphiyerya mwiiriirya ola muulupale waipithihiwe okhuma opattuxiwakaru olumwenku nto vano anuupululeliwa mahiku ookiserya aana a Muluku. Nyuwo munnaamini wira eyo ekeekhaii, wira aana a Muluku annooniheriwa? Nihinatthi hata orowa vatthu, nrowe nikhunle mwa aRooma ekapiitulu 8 minuutu mmosa paahi, mukihye koosomeleni etthu. Noone sinto ela ti yeela eniphiyerya etthu enlavul'aka va. Vano ninrowa waakuxa aRooma 8, versiikulu 19 y'e—y'ekapiitulu 8 y'aRooma.

Maana owehererya vanci-ene. . . itthu sipattuxiwe sinnilipela vanci-ene wooniheriwa w'ana a Muluku.

²⁸ N'uwehererya vanci-ene, soopattuxiwa sothene sinliplela wooniheriwa. Moone, wooniheriwa! Wooniheriwa exeenii? Osuweliha!

²⁹ Olumwenku wothene. Amaka ottaiwene wu, anwehererya yeeyo. Mapuro othene, nipuro pi nipuro, anwehererya yeeyo. "Ari vayi atthu ene yaala?" Ninnikhalanaka e. . . Ninnikhalanaka ettheke enoopa n'ikuru, ninnikhalanaka itari ni overunya, ninnikhalanaka makhura n'iphome, ninnikhalanaka itthu sa inamuna sothene; masi ninnivonya wiiwa Nsu nle noomaaleleya naamukhaani naamuvanre murima profeta, naavitikelenle nlaya mwa yoowo khurwa, khwira, "Miyo kiri va, Pwiya." Munnona?

³⁰ Vano soopattuxiwa sothene sinimwiipulela silipelelaka wooniheriwa w'ana a Muluku. Vano, Paulo onrowa opacerya okhaliha ekereja vekeekhai nipuro vaniir'aya mpantta. Vano wira niphwane mulipiheryo paahi, nrowe nisome-tho.

Paulo, murummwa a Yesu Kristu voothuna wa Muluku, w'ale ooreera murima (awo t'ale "ooreerihiwa") ari w'Efeso, ni. . . oororomeleya mwa Kristu Yesu:

³¹ Vano, wira atthu ehiliyale, ninkela sayi mwa Kristu? Hiyo nniitakanxa mukereja wira nikele mwa Kristu? Nnoolapa wira nikele mwa Kristu? Nnoopwinihiwa mmaasini wira nikele mwa Kristu? Ninkela sayi mwa Kristu? aKorinto Oopacerya, ekapiitulu 12, “Maana mwa Eroho emosaru,” emosaru, E-r-o-h-o ileetera suulupale, eri Eroho Yowarya, “hiyo othene noopatisiwa mMuttettheni wa natiri.”

³² Muttetthe yoola wa natiri, itthu sothene ti sawihu mMuttettheni wa natiri. Munnoona, Munna Collins? Moone, itthu sothene mMuttettheni wa natiri! Okathi Isarayeli omulapunw’awe Yordani, akelaka muttetthe wa natiri, aahiwanela itthu sothene!

³³ Vano muupuwele, mMuttettheni mu wa natiri, eyo khenihimya wira khamuniphwanya iretta, eyo khenihimya wira khasinoophwanyani mixankiho. Masi eyo enihimya yeela, (oh, muhiye ela ekele muhina), eyo enihimya ela, wira ti wawinyu! Nvenye paahi mukuxe! Munnona? Okathi . . .

³⁴ Nto, muupuwele, enamuna emosa paahi Isarayeli aamupweteiy’awe mutthu, p’ukathi etampi yaakenly’aya vapuwani. Eyo ti enamuna emosa naakhanly’ahu onipweteyaka o—oxintta, mwaha w’etampi okela vapuwani, etthu evonyeiye nipuro nlo. Okathi Akani iyaly’awe ephaara ele ni ekuwo ele y’oPapilooniya, etampi yaari vapuwani, vano ekhotto khuvonyeya.

³⁵ Mukivahe ela—ekerej’ela ohiy’ula, nikhuru nla n’atthu, oratteene, orateene muhina mwa natiri a Muluku, ni Eroho Yowarya, yeettaka mwa Eroho, miyo kinnitharimula khula eretta wala khula muxankiho, wala etthu p’itthu ekhanle, khula Joe Lewis okhanle mulaponi, ni ohiroromeleya wawe wothene, ni othene ale ahinaamini akhanle, wira eruuhe khula eretta wala muxankiho vamukhora va, nto awo anookhuma va akumi voolikane-ene. Ayo, mulopwana. Muluku oomuhimya natiri, etampi ya ohaamini paahi t’animukhalaha ottaiwene. Vano ninrowa ophiyerya ele ekhanle etampi ila yaamukhaani, nuuvira okathi vakhani, vano.

. . . ari mwa Kristu Yesu:

Mahala akhale ni nyuwo, ni murettele, wa Muluku Tith’ihu, ni . . . Pwiya Yesu Kristu.

Attotopeliwe Muluku ni Tith’awe Pwiya’ahu Yesu Kristu, yoowo onireerinhe ni mareeriho othene a muroohoni musulu wirimu mwa Kristu, mwa—mwa Kristu:

³⁶ Hiyo nakhala mwa Kristu, ninkhalana mureeriho wa muroohoni. Ota wa Kristu, ninkhalana iyooneo. Mwa Kristu ninkhalana mureeriho w’ekeekhai. Kahi wiipaka-waamini, kahi itakiheryo, kahi wiikuxererya. Masi mweereryakaru ohimya wira muri mMuttettheni wa natiri, nave

muhikhanle, itampi sanyu sinimoophwanyani. Nto, naanaanoru, muniiphwanya ooveveleya ni—ni sothene, ntoko nniihan'ahu mulaponi, oottakatta. Munooosuwela wira khamurina etthu munihimy'anyu. Masi mwakhala mwa Kristu Yesu, Owo ohoolaiheryani murettele wa Wirimu, mareerho a Wirimu, Eroho ya Wirimu, itthu sothene ti sawinyu. Muri Muttetthe wa natiri ni mookhalana voomalela itthu sothene. Amen. Moota ereeraly'aya! Oh, nrowe nisome.

Okhala wira owo oonithanla . . .

37 Vano, va ti vatthu ekereja eniikwattul'aya vanci-ene.

Okhala wira owo oonithanla mwa yoowo . . . (Mwa Pani?) Kristu.

38 Hiyo nniphwanya vano, ottuli mwa—mwa Maphattuwelo ni mwa Wiisuupulula, Wiisuupulula 17:8, wira Owo oonithanla mwa Kristu ohinatthi opattuxiwa olumwenku. Vano, nuulumo . . . Mukihiye kisome ele enttharelana.

. . . opattuxiwa olumwenku, wira nikhale atthu ooreera murima ni oohittheke vamaithoni vawe . . .

Owo oonitthoma . . .

39 Vano kintthuna keemele va nuulumo nenlo na “oottommwa.” Vano, *oottommwa* kahi wira, “Kinoomuthanla Munna Neville, ni miyo—miyo—miyo—miyo—miyo nkimmuthanla Munna Beeler.” Kahi yeeyo. Osuwela wa khalayi wa Muluku aasuwela t'ani aarowa okhala saana ni t'ani ahaari saana. Vano, mwaha w'osuwela khalayi ene, Muluku asuwelaka etthu Owo aarow'awe wira, Owo khutthoma mwaha w'osuwela Wawe khalayi ene wira iirihe itthu sothene weettiherya vamosa wira aareerihe ale animphenta Muluku, wira Owo awerye, mwa okathi ohanle orwa, othukumanya itthu sothene mwa Mmosa, okhanle Kristu Yesu.

40 Mukihiye kookweretheleni elatarato va. Ti yoooreera. Nnootthika, kookupali wira koolavula yeeyo vakhani ohiyu ovinre, ahiiso okwannya, mwa Maphattuwelo, ekapiitulu 1, 1:26, okathi Muluku iihann'awe Nsina Nawe, “Pwiya Muluku,” eri mwa nuulumo na El, Elah, Elohim, nenlo nnihimya “Ole okhanle mmansawe.” Khiyaakhanle hat'etthu ekina yaakhanle woohikhala Yoowo. Khiyaakhanle hata ettheke, khiwaakhanle hata waarya, khisaakhanle hata ittheneeri, khiwaakhanle hata olumwenku, khiyaakhanle hat'etthu ekina. Aari Muluku, nto Muluku meekh'awe, El, Elah, Elohim. Vano, Owo khupaka yeeyo.

41 Muhina mwa yeeyo saari mikhalelo saahimya wira Owo aari. . . Muhina mwa El, Elah, Elohim ula muulupale waahikhala mukhalelo wala e. . . Nyuwo moosuwela ele ekhanle *mukhalelo*, ahiiso mukihiye kihimye so, yaari “ekhalelo.” Eyo eri wira mwaamukhaani iwe, nto miyo ka mmosa w'axikhaani

ontthuneya wira iiwe siiso. Muhina mwa Yoowo yaahikhala ekhalelo y'okhala tiithi, masi Owo t'ule okhanle mmansawe, khiivo hat'etthu wira Owo akhalele Tithi. Nto, vano, muhina mwa yeeyo yaahikhala etthu ekina, wira Owo aari Muluku; ni muluku etthu enikokhoreliwa; masi Owo aari ole okhanle mmansawe, El, Elah, Elah, Elohim, tivo khiyaakhanle hat'etthu wira emukokhoreleke Yoowo. Muhina mwa yeeyo, Owo aari Moopoli, ni khiyaakhanle hat'etthu yaapweteiye wira yoopoliwe. Munnona? Muhina mwa yeeyo, Owo aari Mpenuxa, moone, masi khiyaakhanle hat'etthu yaawereiwa wira epenuxiwe, wala hat'etthu wira ewereiwe. Vano munnoona elatarato ene? Tivo mikhalelo Sawe, ekhalelo Awe sookumiherya ele ekhanle olelo.

⁴² Atthu kamosa-kamosa aniira, "Ahe, mwaha wa zeeni Muluku aheemelin'haawe wopaceryani?" "Owo mulolo ootakhala murima," aahimye ti Joe Lewis, yoole aamulamunle Joe, ahiiso Jack Coe, moone. Khwira, "Owo mulolo paahi ootakhala murima. Khiivo etthu iyo ntoko Muluku. Vaakhanle wira yaahikhala etthu ene yeeyo, Owo aamukhala..." Oh, miyo...khumwiihana Owo ni masina a inamuna sothene, moone. Masi okhala wira paahi owo orina osuwela munci-ene osulu *nno*, masi khorina hat'etthu vathi *va*.

⁴³ Vano, eyo, vale ti vatthu vary'aya. Munnona? Masu ala annihimya va, ni Owo orimwiipithiha. Nto miiriirya iya sinnikhala soowiipithihiwa vano, muupuwele, Bibilia oohimya, "Okhuma woopattuxiwani w'olumwenku, silipelelaka wooniheriwa w'ana a Muluku," wira sooniherye seiyo ekereja. Oh, wulu! Munniwa?

⁴⁴ Vano kinoomaala ehantisi aka vakhani paahi, ahiiso kinooruua...kinokelela muupuwelo aka mukina wira noone yeela. Vano muupuwele, muhina mwa okathi w'othene wa Moise, wu muhina w'okathi wa maprofeta, ottuli muhina w'okathi wothene, awo yaanilipelela mpakha mahiku ala ookiserya wira itthu iya sooniherye, ntoko enihimy'aya Yoolempwa. Ti yeeyo, wira yuupululeliwe aana a Muluku. Mwaha wa zeeni? Okhuma oopweteya...mpakha ntoko epiraamite, ntoko sihimaly'aka, etekiwaka vakhiviruxa, vakhiviruxa, vakhiviruxa.

⁴⁵ Ntoko imaara sinci-ene sihimaly'aka yoothokelela ela, ni wira, Muluku aapanke aBibilia araru. Oopacerya, Owo aamuhenle osulu, sotiiyako. Mootoko omoona sotiiyako? T'ivi ekhanle elatarato yoopacerya mwa sotiiyako? Harusi. T'ivi ekhanle elatarato yookiserya mwa sotiiyako? Leo kharamu. Owo orwiye emaara yoopacerya wa harusi, Owo onoorwa emaara yaneili ntoko Kharamu a nloko na Yuta. Munnona?

⁴⁶ Owo aamupanke oottharelana mupiraamite, wu mahiku a Enookhi, okathi awo yaapakans'aya epiraamite. Nto awo anniphima. Miyo nkinsuwela saana. Masi wa ikhotto, anuuram'aya ni weetta ni makutha okathi munci-ene, ni

anniwerya ophima erakamelo sa ikhotto. Moosuwela vatthu awo amphimel'aya vano? Mpakha epantte ekina y'ekatthi ya mwene. Nto okathi epiraamite ela yaawel'aya...Hiyo khanaarowa owerya oteka, ni itthu sothene sirinaahu olelo. Khanaarowa owerya oteka.

⁴⁷ Eyo etekiwe mpakha osulu so, mpakha v'ethokani. Nto nluku vasulu...Nluku noomaliherya khinnaphwanyike. Awo khanahaleke nleha vasulu v'epiraamite. Miyo nkisuwenle sinto munnisuwela wala nnari, epiraamite yuulupale ya w'Ejitu, khenakhalaneke nluku na vasulu va yeeyo. Mwaha wa xeeni? Nluku noomaliherya nirookhoottiwa, Kristu, Nluku nuulupale, moone, nirookhoottiwa.

⁴⁸ Masi okathi oninnuw'ahu okhuma okathi wa Lutero, okathi w'aPatista, okathi w'aMetotista, okathi w'aPentekosite, mpakha ophiyerya okathi wa Nluku na nleha vano, moone, nilipelelaka ni nitthunaxaka Nluku nlo na nleha wira niitikitherye, empa yoomalela. Khamunsomaka mwa Yoolempwa, "Nluku nirookhoottiwa"? Vekeekhai, hiyo ninoona wira eyo yaahimya Empa y'okokhorela-mo ya Salomoni. "Masi Nluku naakhooitiwe nookhala Nikhulupale na valoomoni." Nto miyo kinihimya ela paahi wira kipake e—e—e—elatarato wa nyuwo.

⁴⁹ Vano, nto mBibiliani, hiyo ninkhala mahiku ookiserya, vasulu v'epiraamite, ihopa soowiikimanya sa okathi wa kankuru mwa sotiiyako, okathi w'orwa wa Leo kharamu, mwa nluku na nleha, ni mahiku owooniheriwa w'ana a Muluku, mBibiliani, moone. Munnoona vatthu vary'ahu? Hiyo vekeekhai nri okathi wa woomalelani.

⁵⁰ Akavi ansoma exornaale esuman'ela, etthu Khrushchev n'akina ahimans'aya? Oh, awo aalikana; siiso hiyo noolikana. Amen. Oolikana! Sothene siri saana, moone. Oh, ore—ore—oreeriwa xeeni, nihiku xeeni! Vaakhanle wira aKristu anniwerya osuwela paahi nihiku ninkhal'ahu. Wulu!

⁵¹ Munuupuwela exeenii? Namalepa a Eliivuru ila, yoowo onne, ni khoona vatthu vaarow'aya wooniheriwa mahiku ookiserya, elipelelaka ni yiipulelaka wira aana awo a Muluku ekhumelele mahiku ookiserya, n'uwerya wa Eroho Yowarya woomalelani w'okathi, wira yuupulule itthu sa siiri okhuma woopattuxiwani w'olumwenku, wira eruuhe.

⁵² Vano nrowe nitthikele-tho "woopattuxiwani w'olumwenku", wira niphwanye muupululo, noone sinto nookhalana exariya wala nnari. Kinroromela wira yoomi nkiniikhaliha namaveeha mwaha w'omwiihana Muluku, "Paapa," masi kintthuna kihimye siiso wira mwiiwe saana. Paapa! Paapa aanaatthuna aana, vano exeeni Owo iiraly'awe? Owo iirale, "Ekhale Malaikha." Vano awo khurwa emurukurenrye-ene Yoowo. Oh, ti yooreera. Awo

khuyamukokhorela Yoowo, vano Owo khukhala Muluku, mikhalelo. Muupuwele, Owo aari El (E-l), Elah, Elohim, okhanle mmansawe, hat'etthu woohikhala Yoowo. Etthu yoopacerya yaakhumelenle yaari Malaikha. Vano, Malaikha khayaakhanle wiiraka hat'etthu woohikhala okokhorela. Khivaaweryaneya Awo opweteya. Tivo, khivaaweryaneya Awo owereiwa, Awo yaari itthu sihinkhwa. Tivo, Owo khaakhanle owooniheryaka owerya Wawe w'openuxa, Owo khaakhanle owooniheryaka woopola Wawe. Tivo nto, ehinatthi, vano mukihiye. . .

⁵³ Vano nuumala yeeyo, Owo khwira, “Ninrowa opaka etthu enikwanyeyeya.” Vano Owo khupaka elapo. Nto Owo vapank'awe elapo, Owo khupaka soopattuxiwa sothene sa mulaponi, vano nto Owo khumpaka mutthu. Itthu sothene saakhumelenle elapo ya vathi; opacerya na—naarokhinya wala metuusa, muthinto w'erutthu paahi ottelemaka vasulu va maasi, khupacerya vaavo, mpakha. . .okhuma yeeyo mpakha naphulu, okhanle enamuna yoomalela onyohowa y'ekumi nikhany'ahu oophwanyaka, enihimmwa, ti naphulu. Enamuna yoomalela wunnuwa ti mutthu. Okhuma naphulu khupacerya mpakha naakhwiitti, okhuma naakhwiitti erowaka erowaka erowaka, nto khula okathi Eroho Yowarya epaceny'aya o “whuuush,” wiiseela, ekumi khurwa-tho; “whuuush,” ekumi yuulupalexa. Nto etthu yoopacerya, khikhumelela etthu yoolattana ni Muluku, owo aari mutthu. Khiivo hat'etthu etonko opattuxiwa, khenatoko opattuxiwa, khenkhalakhala epattuxiwaka-tho, etthu p'itthu yuulupale onvikana mutthu, okhala wira mutthu t'olattana ni Muluku. Munnona? Nto mutthu. . .

⁵⁴ Okathi Owo omupank'we mutthu Awe oopacerya. Vano, okathi Owo opank'awe Malaikha Awe. . .Owo aahimpaka mutthu, “Owo aapattunxe mulopwana ni muthiyana,” othene vamosaru. Owo aari soopiili mulopwana ni muthiyana, oothiyana ni oolopwana. Okathi Owo omupank'awe Adamu khimuhela mw'erutthuni. . .muupuwele Maphattuwelo 1, Owo aamupanke mulopwana ni muthiyana. Nto mwa Maphattuwelo 2, khaakhanle hata mutthu wira alimeke etthaya, mutthu a erutthu. Khaakhanle mutthu aawerya ovarela etthu n'ulima etthaya, masi nnakhala vo aahikhala mutthu aalattana ni Yoowo. “Nto Muluku e. . .” [Muthukumano oniira, “Eroho”—Mol.]. Ti yeeyo. Munnona? Owo aamupanke mutthu oopacerya, “mulopwana ni muthiyana Owo aahaapattuxa.” Vano, okathi Owo omupank'awe mutthu oopacerya!

⁵⁵ Vano, muupuwele, Owo aarina sothene mmuupuweloni mwAwe. Ni Ttiminku ohiyu miyo kaahihimya eyo. Nu—nuulumo ti muupuwelo ohimmwe. Muluku aahuupuwela moota aakhanly'awe ookhalaka Muluku, moota aakhanly'awe ookokoreliwaka, moota aakhanly'awe ookhalaka Mpenuxa, moota aakhanly'awe ookhalaka Moopoli; nto Owo amalakaru olavula Nsu, yaahimaliwa khuluwiru. Oh, vaakhanle wira aana

ala a Muluku vano anniwerya ovarexexa Masu siiso. Okathi Muluku onlavul'awe Nsu, ti yoomalihiwa! Namukhuluwiru! Owo khino aahiwehererya . . . Waalikeliwa wa mahiku anihimya siiso, wala arkeyooloku ni othene, awo anihimya wira khino olumwenku waarina imilyawu ni imilyawu imilyawu sene. Miyo nkisuwenle, siiso saakhanle iyaakha itrilyawu itrilyawu sene. Nkisuwenle okathi xeeni yaarin'aya. Muluku khonikhala m'okathi. Owo khorina hata minuutu onihala wa Okathi Owo olavunly'awe. Owo nlelo Mulukuu. Khokhanle okathi ni Yoowo.

⁵⁶ Miyo nkinasuweleke eyo siiso mpakha ohiyu umosa, voosiisu umosa, kiireke. Ehinimala, kherina nsana, kherina meelo, yothene ti naanaano. Mwaahinto oweha nuulumo "MIYO KOOKHALA"? Kahi "Miyo kaakhanle" wala "Miyo kinrowa okhala." Ti Yoohimala, "MIYO KOOKHALA!" Moone, "MIYO KOOKHALA," okathi wothehe!

⁵⁷ Vano, masi Owo aatthuna ohela itthu mwa okathi. Owo aahaana opaka etthu wira ekokhoreleke, tivo mikhalelo Sawe khikumiherya ela. Vano Owo khumpaka mutthu. Nto, mwa mutthu yoola, owo ooneya meekh'awe. Tivo, vano, wira ooniherye vano muupuwelo Awe muulupale, etthu Owo aarin'awe mwa elatarato ya Kristu ni Ekereja, Owo khaakunxe epante yovirikana y'oloko khumpaka muthiyana, masi Owo aakunxe epante y'Adamu, niparari; vano khukuxa muroohoni mwa Adamu, othiyana, khuhela munipararini muumu. Mwaamoonaka mulopwana oniira ntoko mulopwanathiyana, yookhala etthu evonyeiye. Ni mwaamoonaka muthiyana onthuna wira ntoko mulopwana, yookhala etthu evonyeiye. Moone, yookhala etthu evonyeiye. Iyo irooho piili soovirikana, voomalela. Masi, vamosa, awo anikhala vamosaru, "oowaili ala ankhala mmosaru." Vano Owo aahimpaka muthiyana ni mulopwana, ni khiyaakhalakhala yuuluvalasaka, nnakhala okhwa, nnakhala ottweelela, nnakhala. Awo yaanilya, yaaniwurya, yaanirupa, siiso hiyo siniir'ahu, masi awo khiyaatonko osuwela exeeni yaari etampi.

⁵⁸ Vano kinoohiya vaava ekhale nisomi nikina okathi mukina, wa epyo y'enowa. Yeeyo, kivekeliwaka wira kihokoloxihe yeeyo. Masi mukihye kimoone mutthu onrwa akoonihe etthu yovirikana. Ti yeeyo entthun'aka osuwela, moone.

⁵⁹ Vano, masi nto numala yothene ela, nto okathi etampi ekenly'aya, exeeni enikhumelela?

⁶⁰ Osulu wu, osulu, emilyawu, ikilomo emilyawu ni ikonto imiya thanu na mosa n'imiya tthaaru ni ikilomo miloko mixexe ni xexe, yookhala ephaka so yuulupale, nto owo t'uphenta agapao woomalela. Khula okathi munookol'anyu nivalo epante *ela* nno, enoovukuwa isentiimeturu piili ni nuusu. Ni nyuwo munnisuwela moota waarow'aya okhala vakhaani okathi woophiya elapo ya vathi. Eyo erukuu y'eruku ya iruku.

Owo t'ule orin'anyu, owo t'ule orin'aka, eruku y'eruku ya iruku wa ophenta agapao.

⁶¹ Yookhala etthu mwa nyuwo, yookhala etthu mwa khula muthiyana mu ovinthe iyaakha miloko miili, yookhala etthu mwa khula mulopwana mu ovinthe iyaakha miloko miili, yaarowa otthuna okhala. Nyuwo murina iyaakha thanu paahi, okhuma muloko ni thanu mpakha miloko miili. Nuumala miloko miili munoopacerya okhwa. Masi, okhuma muloko ni thanu, nyuwo mwa mwaana mmiravo mpakha okathi yoowo. Vano nto munoottokottha mpakha ophiya miloko miili. Nto nuuvira miloko miili, oh, muniira, "Miyo ka mutthu ooreerela." Munoohimya eyo paahi, masi khamuhiyo. Munookhwa ni munimoovya, hata mwiraka exeeni. Muluku oopankeni mpakha munnuwelo yoowo, masi nto munrowa okhwa. Vano exeeni eniiraneya? Vano munipacerya okhwa, masi muhina mmo yookhala etthu mwa nyuwo eniira, "Kintthuna kitthikele-tho okhalana iyaakha muloko ni thanu na tthaaru."

⁶² Vano kintthuna kookoheni etthu. Ankhi mwaayariwe iyaakha imiya thanu sivinre, vano munakhalana iyaakha muloko ni thanu na tthaaru mpakha olelo? Vaakhanle wira khamwaakhala mutthu a khalayi, n'ankhili anyu a iyaakha imiya thanu sivinre! Axitiithi anawetta ehinatthi ophiyererya orwa nno, nto nyuwo mwaari mwaaruusi ni enamuna yeele y'ankhili. Vano, mwaamukhala vooreera mwaakelenle ohoolo khuuluvala khukhala iyaakha imiya thanu. Moone, yookhala etthu evonyeiye.

⁶³ Nyuwo muniira, "Ahe, naanaano va kinnoona saana, Munna Branham. Oh, miyo ki—miyo ki—miyo kirina iyaakha muloko ni thanu na tthaaru, kirina iyaakha muloko ni thanu na mosa, kinnoona saana." Oophentiwa, mukihiyeko kooleleni etthu. Munsuwela sayi wira ame anyu akumi minuutu ene yoola, vakhala wira khakhanle mukereja mu? Munsuwela sayi wira amposi anyu khayiiviwe minuutu vakhani sivinre, wala amweetti anyu? Munsuwela sayi wira voosiisu khamunrowa okhala naakhwa mpa mwanyu? Munsuwela sayi wira munookhuma mukereja ohiy'ula, mukumi? Eyo ti yoohisuweleya. Khiivo hat'etthu ensuweleya. Mwaarineene iyaakha muloko ni thanu, muloko ni piili, muloko ni thanu na xexe, miloko mithanu na miili ni thanu, wala miloko mithanu na mixexe, yookhala... sothene ti soohisuweleya. Khamusuwenle vatthu veemenly'anyu. Masi nnakhala vo muninlela otthikela iyaakha muloko ni thanu, muloko ni thanu na tthaaru. Exeeni eniwiirihani siiso?

⁶⁴ Vano, mwatthikela okhalana muloko ni thanu na tthaaru khukhala vaavo, nto kuhikhalakhala nwereiwaka ni nnakhala okhala...mwaahaana okhalana atthu akina ni nyuwo, okhala wira mwaamuvikana wunnuwa iwo, moone. Atthu yaamuphiyerya iyinnuwelo sikina nto nyuwo mwaamukhala a khalayi. Mwaamukhala ootepa ovikana saarow'aya okhala

mwaannunwe-ru ni yaawo. Masi yookhala etthu eniwiihanani wira mukhale vaavo. Eyo ti agapao ule mwaamukhaani, eruku ile yaamukhaani enookhalihani . . . Etthu osulu nno.

⁶⁵ Vano, ohiyu umosa, ahiiso voosiisu umosa, ewoora yaneethanu na piili, okathi Eroho Yowarya, mwaha w'oreera Waya murima ni mahala Aya, yaakikunx'aya okhuma erutthu ila, kookupali, kookupali. Ayo wala nnari, nkinihimya, nto khukela mutteth'ole khuwoona atthu ale, nto awo othene yaari amiravo. Nto kaahiwoona atthu ootepexa oreera kaatonko aka owoona khookhalaru. Nto Owo khukiirela, "Amosa-amosa wa awo yaarina iyaakha miloko mithanu na mixexe. Awo t'atthu anyu oorukunxa murima. Khivanxankiha awo okhuwelaka, 'Munn'aka! Munn'aka!'"

⁶⁶ Vano, eyo erutthu ya wirimu, wira nakhwa vale khaninkhala ettyattyako, hiyo ninkhala erutthuu. Vaakhanle wira hiyo, khula mmosa, aamookhwa, vaakhanle wira musika w'atomu waamuniphula minuutu ene yoola, muhina mwa minuutu mithanu okhuma vano naamukhala nivahana mukhono mmosa ni mukhw'awe ni nipatikhanaka mmosa ni mukwaawe, ni ninyakulaka ni niiraka siiso, ni ninvuwiwaka Muluku! Ayo, mulopwana. Nto Munna mulopwana ni Munna muthiyana Spencer akilanthe va, kookupali wira t'anaitthoko oomalela wuuluvala mu, anrowa okhalana iyaakha muloko ni thanu na tthaaru, miloko miili. Munna Neville aamukhala mwammiravo paahi, ni miyo kaamukhala mwanamwane mmiravo. Nto hiyo othene naarowa okhala paahi. . . Eyo vekeekhai ti Ekeekhai ila. "Emp'ela ya vathi wa nnikhal'ahu yakurumuwa vale, nookhalana emosa ennilipelela,"

⁶⁷ Okathi mwanamwane onikhum'awe mw'ame awe, ntoko eyareliwo w'ephattu, erutthu awe yaamukhaani enooripithuwa ni metto sinootupha-tupha, ni siiso. Kileveleliwe nuulumo nlo, nyuwo athiyana aximwali. Masi, owo aairaka siiso, ookhalana mitika s'ekumi siniitatha. Masi okathi onrw'awe mulaponi, yoopacerya, omphwanya omumula wawe, ni yookhala erutthu ya erooho y'ephattu wira ekele mwa mwaan'owo okathi ene yoowo. Mmuhiye meekh'awe, onookuxa muru awe mwaamukhaani ophiteerihe vanipeleni v'ame awe apacerye waamwa. Ahairale siiso, nipele hata khinaarowa okhuma.

⁶⁸ Mootoko oweha enyompe okathi eniyariw'aya, eyo . . . moota enaakuv'aya okhalana ikuru soophiyerya wira yeemele? T'ani onihimeerya? Enimweetta eviraviraka mpakha w'amey'aya, enapacerya ophavela ni enapacerya waamwa. Oh, ayo!

⁶⁹ Okhala wira, okathi erutthu ila ya vathi eniruuhiw'aya va, yookhala erutthu y'erooho yoolikane-ene wa yeeyo. Nto naanaanoru ela. . . Oh, aleluya! "Nto emp'ela ya vathi va ninkhal'ahu yakurumuwa vale, yookhala emosa ennilipelela iwe." Naanaanoru nimalaka-ru okhuma mwa yeela, ninkela

mwa yeeyo; emosa ehinthhuna owurya maasi ooriirya, ehimphavela owurya maasi; emosa ehinlya, iyo khasihiyo s'etthaya ya elapo ya vathi. Masi iyo ti s'ekeekhai, ni sinniwerya okwannya n'uvahana mukhono, ni ophenta paahi ni itthu sothene ti sooloka. Nto erutthu iyo enoolipelela iwe. Ti epante ya yeeyo. Siri tthaaru wa seiyo.

⁷⁰ Nyuwo munipacerya Ekumi anyu Ehinimala vaava va valtari. Va ti nipuro munipacery'anyu Ehinimala. Oh! Ekumi Ehinimala munipacerya vaava va. Vano muniyariwa vasya, mwaana a Muluku. Vano nto okathi onkhw'anyu, munipacerya... Okathi okhwa wanyu onooman'ayani m'werutthuni mu ni murima khuhiya othhimaka, nto matheko a mookhwaani anoopacerya weemela, eruku ile ekhaani yaari eruku y'eruku, muhina mwa esekuntu emosa enikhala eruku y'eruku, vano enttharelana enikhala erukuu, nto enttharelana enikhala evuvelo ekhaani, nto enttharelana onikhala muratthi, vano ontharelana onkhala muro, nto enttharelana enkhala ephareya yuulupale, nto nuuvira okathi vakhani muniphwanyaneya ohoolo w'ale onaaphent'anyu yeemenle-ene iwe, ewanre-ene ikuwo s'erutthu ya wirimu, ansuwelana mmosa ni mukhwaawe, amphentana mmosa ni mukhwaawe, mutthikenle-ene okhala-tho mmiravo ni mwali. Vekeekhai yoolikana. Eyo enlapelela iwe mpakha orwa wa Pwiya Yesu. Nto nihiku nlo erutthu ile yoovuwihwiwa Yawawe... Vano muupuwele, eyo erutthu ya wirimu, kahi erutthu yoovuwihwiwa, erutthu ya wirimu. Nto nihiku nlo erutthu iyo ya wirimu enoorowa okhuma Wirimu ni Yesu.

⁷¹ "Maana kinooleelani ila nyuwo," aTesalonika Aneili, ekapiitulu 5, ahiiso aTesalonika Oopacerya, ekapiirulu 5, emosa wala ekina, "Kinooleelani wira, nkinthhuna wira mutikhine, axinn'aka, mwaha w'ale anrupa, wira muhiriipiwe murima, ntoko atthu akina ahikhalanne nroromelo. Okhala wira hiyo naakupalikiru wira Kristu ohookhwa khuhihimuwa mmurotoni mwaya, siiso-tho atthu arumpe mwa Kristu Muluku onimwaahihimuxa vamosa ni Yoowo. Maana ninoohimeeryani itthu iya nittharaka mwiixuttiho w'Apwiya, wira hiyo ninrowa ohala nryeene akumi nihiku ninrw'aya Apwiya, khaninrowa waahoolela wala waakhottiha" (nuulumo nooreerela) "waahoolela ale arumpe. Okhala wira nlope n'Apwiya nnooruma, nto ale akhwiye mwa Kristu t'anrowa opacerya ohihimuwa." Irutthu iya sa wirimu sinookhuruwa siware sa vathi, irutthu soovuwihwiwa. "Nto hiyo ninrowa ohala nryeene akumi ninrowa otatuxiwa naanaanoru, mwa waaphila wa niitho, ninrowa okuxiwa vamosa n'awo nithukumanyiwe, nrowaka okumana n'Apwiya osulu."

⁷² "Nkinthhikela-tho owurya eviinyu nnakhala olya-tho mpakha vanrow'aka olya-tho ni nyuwo mOmweneeni mw'Atithi Aka," Niira n'Othela. Maana iyaakha tthaaru ni nuusu nwanani

a Kristu onoomaliha oruma wawe, olumwenku wothene onoononiwa, aYuta animwiihaniwa, Yosefe onimwiisuweliha mmansawe w'amalapo, kiireke aYuta. Muupuwele, okathi Yosefe iisuwelinhaawe w'axinna, khaakhanle hata Mmalapo aari-vo. Okathi owo omurumm'awe. . . Nyuwo munnimusuwela wahala ene. Yosefe, nthoonyeryo noolikana na Kristu, mwa khula enamuna. Nto okathi Yosefe aarumm'awe axinn'awe, vano awo khurwa, nto owo khunweha ni khumoon Peniyamani mwaamukhaani, vano owo khuwoona vale vano nto owo. . . Awo khwira, "Vano, mwaapar'ola! Hiyo—hiyo khavaatthuneya oomwiiva munn'ihu, Yosefe." aYuta yoonaka wira yaahivonya; vano okathi Kristu, okathi Owo oniisuwelihaawe Mmansawe wa yaawo. Ni Yosefe aahiiniwa murima vanci-ene, aahaana ohalela, wunla, tivo owo aahaalaiha amwaar'awe n'ana awe, ni makwarta othene ni itthu sothene sikina, khwaruma orowa empa ya mwene. Vekeekhai volikana. Vano nto ohoolo w'aYuta paahi, owo khwira, "Miyo ka Yosefe, munn'inyu. Miyo ka munn'inyu." Vano nto awo khumora khupacerya othukumela, khwira, "Vano noosuwela wira ninooliva, mwaha w'omwiiva munn'ihu. Hiyo naahimye wira noomwiiva munn'ihu, nto vano owo ti mwen'ola muulupale."

73 Owo khwira, "Muluku iirenle niwoko, wira oopole ekumi." Vekeekhai ti yeeyo Muluku iirenly'awe, wira onoopole hiyo Amalapo. Masi Amalapo yaari mpa mwa mwene. Aleluya! Okhoottiwe-ene n'axinna Awe, Yosefe, Owo aamukunxe Mwaakameliwa; nto Mwaakameliwa aari Mmalapo, kahi muYuta. Vaareera.

74 Vano, Muniphiya yayi vano? Vammal'ahu owara erutthu ila yoovuwiihiwa, ni okathi muulupale ohanle orwa; okathi erutthu ila yoovuwiihiwa, erutthu ila ya wirimu eniira ekhalihewe-ene erutthu yoovuwiihiwa. Munniiwa etthu enthun'aka ohimya vano? Vano kinoowerya orowa ni wira, "Munna Neville!" Mukihiye koovaheni eyooniheryo yaamukhaani. Miyo kiniira, "Munna Humes, nrowe osulu w'aPaapa voosiis'ula." Awo ti Muluku. Hiyo ninnaasuwela Awo vano, Awo ti Moopoli, Awo ti Mpenuxa.

75 Khenakhaleke etthu iyo ntoko opattuxiwa w'etampi. Eyo khekenle saana, yookela? Etampi kahi yoopattuxiwa. Nnari, mulopwana! Etampi ohononiwa. Ori Mpatuxa mmosa paahi, owo ti Muluku. Etampi ti exariya ehononiwe. Oraruwa exeenii? Exariya ehononiwe. Wootha exeenii? Ekeekhai yoohooniheriwa saana. Vekeekhai. Nuulumo nootakhaliha exeenii? Ti iparakha sa Muluku erukunxiwe khukhala nuulumo nootakhaliha wa Muluku, ohiya eparakha. Etampi kahi yoopattuxiwa. Etampi ohononiwa. Tivo, Satana khaakhanle oopattuxa etampi, owo aahononne paahi ele Muluku aapattuxaly'awe. Eyo ekeekhai volikana. Okhwa ohononiwa w'ekumi paahi.

⁷⁶ Vano nwehe ela, nwehe ela. Nto kinoorowa, kiire, “Munna Humes, nrowe nyuwo ni miyo, ni Munna Beeler n’axinna kamosa-kamosa, ninoorowa w’aPaapa, Muluku. Ni, wira, nrowe neette mukwaha mukhaani. Nyuwo amiravo saanoosivelani miyaako okathi nyuwo. . . .”

“Ayo, vekeekhai saaninisivela.”

⁷⁷ “Oh, sookhala ikilomo imilyawu imiya tthaaru ni ikonto imiya piili sa seiyo wu olumwenku uwo musya. Rowakani iwe, mwawele seiyo.”

⁷⁸ “Kihaana o . . . ? . . . nsuwa khula nihiku, nwele osulu saana. Kinoowiiwani. Awo nlelo elavulaka, Miyo kinimwiiwa.” Yesaya 66. Eyo ekeekhaii.

⁷⁹ Nto nyuwo moosuwela, miyo kineetteetta weiwe, othene ahu nineetteetta weiwe paahi ntoko iyaakha soophiyaka imiya thanu, mukwaha mukhaani paahi, emilyawu, khivanvirikana hata vakhani, moone. Nto vano—vano eyo enikhala ntoko ololo, masi ekeekhaii. Moone, eyo ekeekhaii, okhala wira khuuvo okathi, eyo ti Yoohimala. Nto okathi onkhumel’aka ota iwe, kinimweetta iwe, nto moosuwela t’ani miyo—miyo—miyo onimuphwanyaaka iwe? Miyo kiniira, “Ahe, ankhi iwe aahikhale Munna muthiyana Georgie Bruce! Vano, Munna Georgie, voovira okathi munci-ene kiwoonaly’akani.” Onooneya ntoko okathi wothene owo. Munnona? Khino owo aamukhalana iyaakha emilyawu emiya, masi mmiravo ntoko saatonko awe okhala. Owo aamukhala omusunaka mutthu ottuli, nto miyo oweha iwe, ori xiita, kharamu.

Miyo kiniira, “Ehaali anyu voosiis’ula, xiita?”

⁸⁰ “Myawu,” ntoko paakha mwaamukhaani. “Oh, kinnikhalaka ohitto iwe kilavulaka n’axinna kamosa-kamosa axithiyana nryeene mukerekhere wa maluwa ale maalupale iwe, naari iwe iyaakha soophiyaka imiya thanu, moone, niwehawehaka.” Vano, eyo eniiweya ntoko ololo, masi ekeekhaii. Eyo ekeekhaii. Eyo t’inamuna Muluku aatthunn’awe.

⁸¹ Ahe, mureerhiwe murim’anyu, Munna Georgie. Khuuvo otakhala onwerya orwa, hat’etthu nnakhala. Okathi wa makaaripi hiyo nnoorowa vasulu vamwaako, niire, “O Paapa, Muluku, kaahinto orimeela. Oh, kaahinto okhala mwa soonanara s’etampi, Paapa, Muluku, vano Nyuwo khukoopola.”

⁸² Vano, athu yeerenrye olavula yeeyo yaahivahuwa. Ahe, mulopwan’ole olempe eversu yookiserya ya *O Ophenta Wa Muluku*, yaalempwe vaxirini v’empa y’anamukhwanepa, eerenrye olavula ophenta wa Muluku. Moota Owo uurammy’awe wira owoopole anatampi, ni moota Owo iiraly’awe, ophenta Wawe waakhurunwe wira owoopoleni nyuwo ni miyo. Olavulaka mwaha w’okokhorela, Malaikha khansuwela etthu ya yeeyo! Okokhorela, Nlaikha ninsuwela paahi. . . Nle nneemela vale n’uttikinya mapuph’aya ottuli n’uhoolo, ni epantte t’ipantte,

“Aleluya! Aleluya!” Masi, oh, ikharari! Vaaphiyereryaka osuwela wira kaahirimeela nto vano koophwanyiwa, kaahikhwa, kookhala-tho mukumi! O Muluku, kaari etampi, kaari nikhurumela, ni kaari okhwipi!

⁸³ Va ti vari yooreera ekumi yaakhanly’aya woovahakani. Mwaahinto orowa ohitto nno okhwipi wa Colgate? Ti nipuro nootepexa wunkha kitonko aka okhala-vo. Mwiix’ule onookiwereiha woona wunkha paahi. Kiryeene vale vamwiixini vale wothene, oowereiwa mmirimani, ootepanyeya ene, nuumala owurya makhura a ikhura. Moone, oowereiwa sinweryaney’aya okhala! Ni makhule yooviravirakani, etthunaka wookhuurani. Nto ti yoomalela oreera y’ekumi. Vano nto mutthu khookola moonoo mpakha vathi khookuxani. Ni nyuwo muryeene oowuuluvala saana muhiweryaka wiikhaliherya. Vano khookuxani paahi khoothikelihani okhala mmiravo a iyaakha muloko ni thanu na tthaaru, khoohelani vasulu vamwaako, ephuwelo ene yeeyo y’ekumi, wulu, omumula wooreera w’ettheke yooriirya siiso, owurya maasi ooreera ooriirya. Mwaamutthuna othhikela-tho okhwipi weiwe? Nnakhala, nnakhala, nnakhala, nnaarowa-tho okhwipi iwe.

⁸⁴ Vano, ti yeeyo enihimy’aya, mpatthani. Ti yeeyo ekhanle yoowoona ele, ahiiso okuxiwa, etthu p’itthu, yoowoona. Kinoochimya wira yoowoona, ’okhala wira kinnoova wira yaamurowa omunanariha mutthu wira okuxiwa, eyo ti yeeyo yaakhanle. Vano, vo p’ukathi Muluku...etthu Muluku iiraly’awe wira aaruhe aana alopwana n’athiyana wa Yoowo. Vano, t’ani atthu ene yaala? Moota xeeni awo atonko aya... Atthu ala yiirale xeeni wira aphwanele yeela? Moota xeeni awo atonko aya wira? Muluku, wopaceryani, nihinatthi Nlaikha hata opattuxiwa...Akavi ansuwela wira Owo t’ohimala? Owo aahikhale, kahiyo Muluku. Tivo, Muluku, mwa omoriwa Wawe ikharari ohinimala, Owo aahoona wira Lucifere aarowa wira ele, Owo aapattunxe-ru ila. Owo aarowa waahela mwa otaphuwa w’otthuna, mulipiheryo yoowo. Vano nyuwo nlelo muri vaavo, ti yeeyo, mwiri wa yooreera ni yootakhala ori ohoolo wa khula mmosa a hiyo, nyuwo munoothanla. Vano Lucifere t’apacenrye okuxa ephiro yoonanara. Nto owo khupacerya wiiruuhela, wiisoonaa, onatthuna okuxa sothene mmansawe, weererya omweettiherya mutthu mukina. Nto ti vaavo vapacenry’aya. Vano, nwiriyanee ela. Ti vaavo etampi epacenry’aya. Muluku, mwa muupuwelo Awe ohinimala, aahoona eyo, ni aahoona wira enamuna emosa paahi... .

⁸⁵ Vano, nyuwo axinna a oraaru, nkinthuna woonanarihani, masi mwa Nsina na Masu ooreera a Muluku mwaarowa okhalakhala sayi mmukhalihaka Yesu mutthu oovalaanyana ni Muluku Mwaneene? Vaakhanle wira Yesu aammukuxa mutthu mukina khumuroiha khukhwa, wira anvuluxe mutthu ula va, Owo aamukhala mutthu oohikhalana exariya. Eri enamuna

emosa paahi Muluku aakhanly'awe wiiraka, yaarowa okhala okuxa opuro ene Mmansawe! Vano Muluku iipanke erutthu wira Owo awerye olawiha owereya wa mookhwaani, wira akumihe mpunu ni okhwa mwa hiyo, wira hiyo nivuluxiwe ni Yawawe Yoowo. Mwaha wa yeeyo Owo onrow'awe okhala ookokhoreliwa. Yesu aari mutthu, vekeekhai aari Yoowo. Owo aari mutthu, m-u-t-t-h-u, aayariwe ni harusi Maria. Masi Eroho yaari mwa Yoowo aari Muluku oohiphimmwa, mwa Yoowo waakhala oMuluku wothene woomalela mw'erutthuni. Owo aari Yehova-jire, Owo aari Yehova-rafa, Owo aari Yehova-manase, Owo aari Yehova; Nikula nahu, Nikula nahu n'ekhotto, Mpenuxa ahu; Owo aari Alfa, Omeka, Ephattu ni Emalelo; Owo aari Oopacerya, Ookiserya; Ole Aakhanle, Ole Onkhala ni Onrowa Orwa; Yoophuwa ni Mulipu wa Davidi, Ettheneeri y'Oxaka, vano, Owo aari Sothene mwa sothene. Mwa Yoowo waakhala oMuluku wothene woomalela mw'erutthuni!

⁸⁶ Nto okhwa kweekwe waahikhalana mpunu, waaluman'aya atthu, "Ah," xetwani oniira, "Kihoophwanyani, okhala wira mookiiwelela. Kinimoolumani, kinimoohelani mukhapurini. Ephome'le y'epwittipwitti khenwerya wookhaliheryani, ele ephome ya mwaxinama paahi." Masi Muluku, mwa osuwela Wawe, aahisuwela wira aamukhala Mwaapwittipwitti aarwa, iiviwe okhuma opattuxiwakaru olumwenku. Ayo, mulopwana. Nto awo...Owo khulipelela okathi yoowo, omalela w'okathi waarowa orwa.

⁸⁷ Masi nihiku nimosa varwiiy'awe Mwaapwittitthi ula, Mutthu ula, Satana aahiwoikiwa. Owo aaroomuweha Yoowo, owo khwira, "Nyuwo mwaari Mwaana a Muluku, mwiire *ela*. Nyuwo mwaari Mwaana a Muluku, pakani mwiiriirya mukihye kiwooneni Nyuwo mpakaka. Mukihye kiwooneni Nyuwo mpakaka. Ah-ha, Kinoohelela ntapwatta wiitho Wawe, koomaneni. Nyuwo mwaari profeta, munleele oomanneni." Hmm! "Miyo nki, miyo nkinaamini wira Nyuwo mwa Mutthu yoowo. Nyuwo mwaari yoowo, munleele oratteene moota Nyuwo okhanly'anyu." Moone, othene siiso. "Oh, munleele wira Nyuwo mwa yoowo!" Owo khaatthukunle eyano Awe. Oh, oh, Owo aahikumihya manri mmaithoni mwaya nto!

⁸⁸ Owo aarimwaaweha awiixutti, khwira, "Kaamwaaleela Atithi Aka nto Awo yaamukivaha mittitthi muloko ni miili sa Malaikha, kaatthunne-ru." Pilato khaiwale eyo, moosuwela.

⁸⁹ "Nyuwo mwaari! Nyuwo mwaari. Oh, ole kahi Yoowo. Vano, nkanweheni Owo onivuuva ephome. Eyi, nyuwo anakhotto kamosa-kamosa nkarowani iwe mwamusenyele wiitho Wawe." Khimusenyela, khunveeha, khuropocola ireru makuphi wiitho Wawe. "Oh, Owo kahiyo! Nnari, ole kahi Yoowo! Kinoohelela mpunu aka mwa Yoowo, mmiravo. Kinoomuvara Owo osulu iwe. Kihoovarani vano!"

90 Wokiseryani vakhuwenl'awe, "Eli! Eli! Muluku Aka! Muluku Aka!" Ole aari mutthu. "Mukinyanyalenleni?"

91 Omatta w'oKetisimani, mureerihō waahimuhiya, moosuwela, Owo aahaana okhwa ntoko natampi. Owo aakhwiye natampi, moosuwela eyo; kahi itampi Sawe, masi sawaka ni sawinyu. Vale ti vankel'aya ophenta iwo, moota Owo okunx'awe sawaka! Oh, aleluya, moota Owo okunx'awe sawaka!

92 Nto Owo aari vale, Owo khaawenrye otthukula eyano Awe. Mponu khwira, "Moosuwela, kookupali wira ole aari mutthu pure. Ole khaayariwe ni harusi, maana koohela mpunu aka mwa Yoowo."

93 Nto owo onoorwa va, khuhela mpunu awe mwa Yoowo, masi owo waari okathi woohiloka, mulopwana! Waahikumihwiya mpunu awe nto. Owo khonwerya-tho oluma okhuma vaavo, owo ohin'ye memme mpunu awe. Khuhihimuwa mmurothhoni mwaya, khwira, "Miyo ka Yoole kaakhwiye, nto kinkhala-tho, ni kinkhala vohimala-tho, kihaana mihulelo sa mookhwaani ni omooroni." Ayo, mulopwana. Owo aahivonya woona wira ole aari Pani. "Ni okhala wira Miyo ka mukumi, nyuwo munrowa okhala akumi-tho. Nlelo khenarwe. . ."

94 Nihiku nimosa, mahiku mararu wala maxexe nuumala yeeyo, Owo vaamanly'awe owela w'Atithi, aahihokolowa, nto akina khwira, "Oh, Owo ti. . .Owo—Owo khino munepa. Owo siiso okhanle-ene etthu ya munepa ya Mmirav'ole. Nto hiyo. . . Nyuwo moomoona Yoowo. Muhoona yoowoona."

"Nnari, Ole aari Yesu eekeekhai."

95 Tome khwira, "Mukihye koone matata Awe ni itthu sothene, kinimooleelani aaryeene yoowo."

96 Owo khwira, "Miyo kiri va." Khwira, "Mookhalana ehopa n'iphawu vo? Mukiruuhele esante." Vano awo khimuruuhela esante, vano Owo khweemela vale khukhuura. Khwira, "Vano, erooho ennilya ntoko Miyo sinly'aka? Erooho yookhalana erutthu ni makhuva ntoko Miyo sirin'aka?" Munnona? Owo khwira, "Miyo ka Yoowo. Miyo ka yoole."

97 Nto Paulo ohimye wira, "Khenatthi ophiya nlelo oratteene muthinto w'erutthu onrow'ahu okhalana, masi noosuwela wira ninrowa okhalana erutthu ntoko Yawawe." Exeeni? Owo ootoko okhalana erutthu ile ya teyofaniya? Ayo, mulopwana! Okathi Owo okhwi'y'awe, Bibilia ohimye wira, "Owo," ti nuulumo na mutthu-tho, "Owo aaronwe wookhwaani khulaleerya minepa sitthukweliwe." Aleluya! Owo iirale sayi yeeyo? Owo aahikhalana miyoonelo s'okwannya, Owo aahikhalana miyoonelo so wiiwa, Owo aahikhalana miyoonelo so olavula, Owo aahilaleerya ni muthinto yoole w'erutthu koonaly'aka iye soovuwihiwa ohiyu ule. Owo aahilaleerya minepa saari omooroni, sahaarukunxale murima mahiku oowehererya n'uvilela a Nowe.

⁹⁸ Masi okathi Owo ohihimuwaly'awe nihiku na Pasikha, khivaaweryaneya erutthu ile wuntta, 'okhala wira profeta Davidi aahoonu khalayi ene, "Miyo nkinihiya munepa Awe mookhwaani, nnakhala nkinimuhiya Oowaarya Aka wuntta. Tivo erutthu Aka enoomumula ni nrromelo, okhala wira Awo khanihiya munep'Aka mookhwaani, nnakhala khanimuhiya Oowaarya Aka wuntta." Nto iwoora miloko mithanu na miili ni piili wuntta ohinatthi okela, eteyofaniiya ele, erutthu ile yaaronwe khulaleerya minepa saatthukweliwe, sahaarukunxale murima mahiku oowehererya n'uvilela wa Nowe, yaahihimuwa-tho, vano ele yookhwa khuwara ehinikhwa, nto Owo khuyenya, khulya, ni Owo khunihimeerya wira Owo aari Mutthu. Aleluya!

⁹⁹ Ti siiso ninrow'ahu omoona Owo, Munna Evans. P'ukathi Owo onrow'awe okilaathi veehiceni va Davidi. Aleluya! Owo p'ukathi onrow'ahu weetta osulu ni vathi vano, kinimweetta mukwaha ni nyuwo kivraviraka miyaako iyaakha emilyawu, moone, mahiku vakhani paahi, minuutu vakhani paahi, hiyo nnoorowa olapuwela iwe, ninookilaathi iwe.

¹⁰⁰ Nto oniphiya okathi w'olya, moosuwela, naanaanoru, Munna Wood muthiyana khwira. . . Miyo khwira, "Munna Wood, ahe, mwaari vayi okathi ula wothene? Nkiniwoonani mwa. . . wa miyo sinikhala ntoko sivinre minuutu muloko ni mithanu."

"Oh, iyo iyaakha ikonto piili sivinre, Munna Branham."

¹⁰¹ "Ah-ah. Munoonu sayi?" Oh, vekeekhai khamunoonu etthu woohikhala oreera.

¹⁰² "Eyi, nkarwaani va, amiravo, kinoowoonihani etthu nyuwo othene, axinna, axiinn'aka oophentiwa. Wookhala muro wa maasi va, oomalela oreera mutonko anyu owurya. Nto, oh, ninoowurya maasi ooreera ooriiryu. Kinoorowa osulu iwe kakuxe nivara nuulupale na iwuuva, nto othene ninookilaathi vale nilyeeke." Eyo khenrowa okhala yooreerexa? Vekeekhai ti yeeyo ery'aya. Vekeekhai ti yeeyo.

¹⁰³ Niphwannye sayi yeela? Ninsuwela sayi yeeyo? Muluku, ohinatthi opattuxiwa olumwenku, oroonitthoma hiyo! Aani? Ale ari mMuttettheni wa natiri.

. . .oonitthoma okhuma khalayi wira nikhale ana mwa Yesu Kristu. . .ntoko suupuwenly'awe n'utthuna wawe,

Wira nikhale oottotopela ovuwa Wawe. . .

Wira hiyo nimuttotopela Yoowo ntoko Owo saahimaly'awe. Ti yeeyo Owo aary'awe, Muluku. Hiyo nintthuna omuttotopela Yoowo.

. . .ottotopeliwe ovuwa wawe mahala awe, mwa yaawo onikhalinh'awe ookupaliwa mwa oophentiwa. Mwa Kristu hiyo ninnikupaliwa.

*Mwa yoowo nookhalana woopowa mwaha w'ephome,
oleveleliwa wa i-t-a-m-p-i. . .*

¹⁰⁴ Kihaana otthikela mwa okhalihwiwa aana, masi kintthuna keemele va "itampi" va minuutu mmosa. "Itampi," mooweha yeeyo? Munnisuwela wira Muluku khommulamula natampi mwaha wo wira etampi? Owo ommulamula mwaha w'okhala natampi. Vakhala wira natampi onimulya sikaro, Owo khommulamula mwaha wa yeeyo; owo natampii, khula enamuna. Munnona? Munnona? Owo khorina hata itampi, natampi khorina. Owo natampii paahi, moone, owo khorina hata itampi. Masi nyuwo mookhalana etampi, nyuwo mukhanle aKristu. Munnihweha va wira owo onlavula ni Ekereja. Okhaliha oratteene. Munnona? Munnona? "Oleveleliwa wa itampi," i-t-a-m-p-i. Hiyo ninniira itampi. Masi natampi natampii tu, Muluku khommulevelela.

¹⁰⁵ Vano, nyuwo muniira, "Ahe, awo arookhuma nno khumoopela mutthu. Munrowa wira exeeni mwaha wa yeeyo?" Owo kahi mwah'aka hata vakhani. Miyo nkiihiyo namarehererya, miyo ka mulaleyi. Malamulo anootharathara eyo, awo t'anamarehererya. Awo t'a. . . "Ahe," muniira, "awo aroorarawa." Eyo, eyo—eyo ti ya malamulo. Eyo ti yawawe owo ni malamulo. Miyo—miyo—miyo—miyo nkiihiyo namarehererya, miyo nkinaarehererya atthu. Miyo kintthuna awo erukunxe murima. Miyo ka mulaleyi, moone, muteko aka omuroiha owo wa Muluku. Vakhala wira owo orimwiira etampi, owo mwah'awe, owo natampii. Muluku t'onimulamula mwa mukhalelo muulupale. Owo natampii opacerya wene, owo t'olamuliwa opacerya wene. Owo hata khonaphiyerye mulipiheryo woopacerya, owo—owo—owo khokhanle hata nipuro. Owo natampii opacerya wene. Owo khorina hata itampi, owo natampii.

¹⁰⁶ Khimwaakhanle ookhumaka ni wira, "Emoori *ila* ohiyuu, nto emoori *ila* kahi ohiyu." Nnari, wothene ohiyuu, wothene ohiyuu paahi. Eyo t'ile Muluku ohimmy'awe. Ti yeeyo, owo natampii tu, ti yeeyo tu. "Vano, awo ahiira ela, emoori *ila* ohiyuu, *ola* ohiyuu woowaarya saana va." Miyo koosuwela, masi wothene owo ohiyuu, ti yeeyo tu. Munnona?

¹⁰⁷ Nkaakhanle oohimyaka wira, "Emoori *ila* va waaryaa." Nnari, wothene owo waaryaa, moone, waarya paahi, khamukhanle oohimyaka eyaattelo xeeni. Munnona? Masi owo aakhanle-ene nlepa nooriipa mwa *ela*, vano eri epiphi mwa yeeyo.

¹⁰⁸ Tivo "itampi," i-t-a-m-p-i, hiyo nookhalana oleveleliwa wa itampi sahu mwaha wa (exeeni Awe?) Ephome, Ephome yooreerexa.

. . . ottharaka ovuwa wawe wuu. . .

109 Ninliyala sayi? Okhala wira ninniphwanela, nihiira etthu wira nikhhalane itampi sahu sooleveleliwa? Exeeni Awe?

. . . *mahala*;

110 Oh, wulu! Khiivo hat'etthu eniruuhaaka mmatatani mwaka, Pwiya. Khiivo hat'etthu khikhanly'aka wiiraka, khiivo hat'etthu kaarow'aka owerya wira. Nkawehani! Owo orookitthoma, Owo orookiihana, Owo orookithanla. Miyo nkinamuthanleke Owo. Owo orookithanla, Owo orimoothanlani, Owo oroonithanla othene ahu. Hiyo khanimuthanlale Owo. Yesu ohimmye wira, "Nyuwu khamukithanlale Miyo, Miyo koothanlalani." Owo ohimmye wira, "Khaavo onwerya orwa wa Miyo ehikhanle wira Atithi Aka anoomuruuha toko, nto othene ale Atithi akivahaly'aya animoorwa wa Miyo. Ni khaavo mmosa a yaawo onrowa orimeela, woohikhala mwaana a orimeela, wira emaliheriwe yo—Yoolempwa." Munnona? Ohimmye wira, "Masi othene ale Atithi akivahaly'aya animoorwa wa Miyo."

111 Oh, kinooxeleliwa vanci-ene, kahi siiso? Nto nkinrowa-tho okhuma mwa yeela. Nnya nkinatthi opacerya yeela. Mukihiye kaakuve, kihaana ophiyerya etthu va naanaanoxa va, nto nnimwaakuva. Kihaana otthikela okhalihwiwa aana nno minuutu mmosa paahi. Oh, munookilevelela paahi minu—minuutu mmosa paahi? Nrowe nikuxe ela va, atthu ala kamosa-kamosa va ankhuma oGeorgia nno mwaha w'ohiy'ula paahi, oreerihwe murim'aya. Vano, munna muGeorgia, ni Texas ni vathu ti vathu munikhum'anyu, nwiriyane eversiikulu 5 ila. Nrowe nikhale mwa yeeyo minuutu vakhani.

Oonitthoma okhuma khalayi wira—wira . . .

112 Exeeni enihimya nuulumo "wira", nuulumo "wira"? Enihimya wira etthu enrow'ahu ophiyerya, wira. "Miyo kinrowa v'ephattuweloni. Miyo kinrowa vakhaterani." Humes, muhiwa saana yeeyo? "Kinrowa oskritooryu."

Vano, Owo *oonitthoma okhuma khalayi wira nikhale aana mwa Yesu Kristu mwa yoowo, ntoko Yoowo Mwaneene suupuwenlyawe n'utthuna wawe,*

113 Eyaattelo xeeni vootthuna? Waari otthuna w'ani, oreera murima w'ani? Yoowo Mwaneene. Otthuna Wawe Mwaneene wa Mmansawe Yoowo!

114 Vano, exeenii "okhalihwiwa aana"? Vano mukihiye kikuxe ela vano, nkisuwenle sinto. . . Nkinrowa okhalana okathi w'omaliha yeela, masi kinoophiyerya. Vano yakhala yookoha, mukikoheke ohoolo waya mwa okathi mmosa mwa mutthaka mmosa, etthu. Nwiriyane. Okhalihwiwa wanyu mwaana kuhiyo oyariwa wanyu. Okhalihwiwa wanyu mwaana t'uheliwa wanyu vooপুরoni. Okathi oyariw'anyu vasya, Yohani 1:17, kookupali, okathi oniyariw'ahu ni Eroho ya Muluku, ninkhala aana a Muluku. Masi hiyo niroothommwa. Vano va ti vari etthu entthun'aka woophihani-

vo, wa aana ala a mahiku ookiserya, moone. Wira . . . Munnona? Hiyo nirootthommwa wa (wira) nikhale aana.

115 Vano, vano hiyo nri va. Vano, ela t'itthu enaananariha aPentekosite vakhani. Awo aniira, "Kooyariwa vasya! Attottopeliwe Apwiya, kihaana Eroho Yowarya!" Vaareera. Nyuwo mwa mwaana a Muluku. Eyo ekeekhaii. Masi nnakhala vo eyo kahi ile enihimy'aka. Moone, nyuwo murootthommwa wira mukhale mwaana. Omukhalaha mwaana, omuhela mwaana voopuroni.

116 Kiri vakhiviru va yeeyo, 'okhala wira Becky ookileela wira nkireere waattamela yeeyo, khamunwerya wiiwa eri ottuli. Miyo kiri . . .

117 Moone, mwaana. Akavi ansuwela ikano s'okhalihwi mwaana Waataana Wa Khalayi? Vekeekhai, moophavela. Mwaana aamuyariwa. Kookupali wira kookhalana eyo mwa mutthaka mmosa. T'evi yeeyo, Gene, munnuupuwela? Eri mufiitani. Oh, yaari exeeni iyo? Miyo—miyo—miyo—miyo koolavula eyo. Oh, ayo, koophwanya, *Mmwiiweleleke Yoowo*. *Mmwiiweleleke Yoowo*; okhalihwi wa w'ana.

118 Vano, mwa Waataana Wa Khalayi, okathi mwa—okathi mwanamwane aayariw'awe vatthokoni, owo aari mwanamwane okathi aayariw'awe, okhala wira oyariwe n'axitithi awe, aari mwaana a vatthokoni ni mulipa-oorithi itthu sothene. Vano, masi mwaan'ola aasukiwa n'alipa-ookhapelela. aKalasiya, ekapiitulu 5, versiikulu 17 mpakha 25. Vaareera. Owo aasukiwa n'alipa-ookhapelela, oolela, oowixuttiha. Vano, mwa nlikanyiho, kaayareliwe mwaana, niireke, miyo ka tiithi ni . . .

119 Nto mwaha wa yeeyo mwa King James [Mutaphulelo wa Bibilia mw'Enkelesi—Mot.], akavi atonko wuupuwela yeeyo okhala yootheiha Mutaphulelo King James, ehimye wira, "Owannyaya Atithi Aka khareere-wo mapuro ookhala"? Empa, mapuro manci-ene ookhala. Munnona? Vekeekhai, mahi—mahiku Bibilia otaphuleleliw'awe Mwene Yakopo, *empa* yaari "epewe." "*Opewe* w'Atithi Aka khareere-wo mapuro ookhala." Kahi empa emosa, mapuro ookhala, masi Owo ihaniwa Tithi a epewe yeela. Awo jaarina eyo va Bibilia saana, mBibiliani ti siiso ery'aya.

120 Okathi tiithi aakhalan'awe ematta yuulupale ya ikitaare imiya xexe ni xexe, wala ethu ekina, owo aanikhalana nikhuru n'atthu yaakhala *nno*. Owo aanikhalana atthu aalepel'awe ovara muteko *nno* wira esukiheke ipwittipwitthi, owo aanikhalana akina *nno* wira esukiheke inyompe, owo aanikhalana akina *nno* yaarowa osulu mmunyepuni iwe ikilomo emiya ni miloko mithanu na mosa, ni aanikhalana akina *nno* yaasukiha ipuri, ni aanikhalana akina yaasukihaka amuula ni—n'itthu soohiyana-hiyana. Owo—owo aakhalana omwene wuulupale paahi. Vano owo aamuwela mwaapuuru awe n'uvira-vira wa khula mmosa ni

woona moota yaakelel'aya ohoolo, ometthiwa wa ipwittipwitthi ni itthu sothene siiso. Owo khaakhalana okathi . . .

¹²¹ Khamunwerya okiiwa kaakhumaka vale. Miyo—miyo—miyo kinimweeserya okhala ottuli nno. Munniwerya okiiwa oratteene vano, va? Nwehe.

¹²² Owo aamukhuma eettihaka ekhavalalo, khurowa, atthunaka o—okhapelela omwe—omwe—omwene awe. Tivo vano owo ontthuna . . . Mwaan'owo onrowa okhala mulipa-oorithi a itthu sothene owo orin'awe. Owo ti mulipa-oorithi.

¹²³ Nto okathi oniyariw'ahu mOmweneni mwa Muluku, mwa Yesu Kristu, ninkhala alipa-oorithi a Wirimu, alipa-oorithi vamosa ni Yesu, okhala wira Owo ookuxa nipuro nahu. Owo ohiikhaliha hiyo (etampi), wira hiyo nikhale Yoowo (exariya). Munnona? Owo ohiikhaliha miyo wira miyo kikhale Yoowo, moone, alipa-oorithi vamosa ni Yoowo. Vaareera, vano muupuwele yeeyo, wa khula mmosa a nyuwo.

¹²⁴ Vano, muupuwele, Muluku orimootthomani, mwaha w'osuwela khalayi ene, wira nyuwo mwaamuphiyerya Yeela. Othene aniiwa saana, nvenxe ntata nanyu, moone. Muluku, mwaha w'osuwela khalayi ene, ohootthomani wira murwe Muttetthe wa natiri. Muttetthe wa natiri exeenii wa muKristu olelo? Nvenxe ntata nanyu paahi mwaasuwelaka vale. "Natiri t'awinyu ni awaya an'inyu, n'ale ari ottaiwene. Nto enimwiiraneya mahiku ookiserya, onihimya ti Muluku, wira Miyo kinimwaamwaraxela Eroho Aka atthu othene, an'inyu alopwana n'athiyana." Ni mwa Yesaya 28:18, "Nikano vasulu va nikano, yooruma vasulu va yooruma; va vakhani, vale vakhani. Muthanleke sooreera. Maana Miyo kinimwaalavulela atthu ala ni moolumo ookukuma ni ilavulelo sikina. Vano nno t'okhanle omumula, (o—Omumula) muttetthe wa esaapatu kihimmy'aka wira awo yaahaana okela. Nto, wa sothene iya, awo khayaatthuna wiiwale Yeeyo." Munnona? Vekeekhai.

¹²⁵ Yaari exeeni iyo? Vekeekhai ntoko atthu ale jaarwiiye okhuma oKananani, ahiiso okhuma wEjitu, ephiro yothehe eviraka mothakoni, nto khuphiya vakhiviru wa, vakhiviru voophiyerya wira elawihe iwuuva saakhumme mmuttettheni. Munna, vo, alopwan'awo anthhuna wira kihokoloxe eyo, yeeyo ya aHeperi 6. Kookhala mwiira sayi yeeyo? Alipa-oowaamini awo a mmukaanoni, awo khankhalakhala elapuwaaka. Yesu oohimya.

Awo yiirale, "Axitiith'ihu yaahilya emana mothakoni."

¹²⁶ Vano Yesu khwira, "Awo, othene, ahookhwa." Iwo ovalaanyiwa. Awo, othene, ahookhwa. Ti yeeyo. Khwira, "Masi Miyo ka Yolya y'Ekumi kikhumme wa Muluku a Wirimu. Mutthu onlya Yolya ela, khankhwa. Eyo ekeekhai. Ayo, mulopwana, owo ookhalana Ekumi Ehinimala alyaaru Yeela, Miyo ka Mwiri yoole w'Ekumi w'omatta ya Edeni."

127 Vano, moone, atthu ala anoophiya vakhiviruxa! Moone, mwaweha vale mwa aHeperi 6, kahi otthikela mwa yeeyo, masi mwa aHeperi 6, “Atthu ala yaatonko wira mpantte, khuphiya vakhiviruxa, khulawiha yoovaha ya Wirimu.” Awo anookilaathi vakhiviru, khoona ovonihiwa wiiriwaka, aawoona atthu mwa owerya wa Muluku, ahoona makhalelo orukunxiwa, masi khandthuna ohela ntata naya mwa Yeeyo. Nnari, mulopwana. Nnari, mulopwana. “Ni aalawiha owerya w’olumwenku onoorwa; vano yatthuna-ru otthikela-tho mmansaya orukunxa murima, okhala wira awo—wira w’awo annimukhomelatho Mwaana a Muluku, ni aaveeha Ephome yo waataana yaakhalinhe oowaarya . . .”

128 “Miyu kiniira mpantta w’ekereja enaamini oreerihiwa.” Eyo ti yooreera mpakha vamphiya’aya, masi khamunrowa ottaiwene voophiyerya. Munnona? Ayo, mulopwana. Othakoni waahaareeriha. Ayo, vekeekhai. Awo yaahikhalana e—awo yaahikhalana enowa y’epronse ni a—altari eeporonse, ni itthu sothene mme, oreerihiwa, masi awo yaahikela oPalestina wira emumule. Khayaa . . .

129 Nkawehani mwa aHeperi 4, owo khohimmye wira “Omumula okina”? Muluku aapattunxe nihiku naneethanu neili khwaavaha omumula nihiku naneethanu neili. Nipuro nikina oolavula mwaha wa nihiku n’omumula, “nto olelo mwa Davidi.” Vano Owo ohaavaha Omumula okina, “Murwe wa Miyu nyuwo othene mulemeliwe ni muhaaxiwe, Miyu kinimoovahani Omumula.” Nkele Moomumulani mu! Maana hiyo nikenle Moomumulani mu noomaliha miteko sahu ntoko Muluku simalinh’awe Sawawe saapatu. Vekeekhai. Yookhala esaapatu anyu, Omumula. Vo ti vari Omumula wanyu w’ekeekhai Mmuttettheni muumu mwa natiri.

130 Eroho Yowarya ti natiri aatthu. Nto mwaha wa xeeni awo anaatthun’aya alaleyi oowiixuttexa oosomexa anrowa waahiya yaawaraka akaputtula ni omettha maihi aya, ni wootta ipato, n’alopwana animuttikha cuuku n’umuwurya saravexa n’uhimya iperwa, n’urowa wira itthu siiso, ni wiisiihana atthu aniira mpantta wa ekereja? Vano, awo anookuxa etthu ntoko yeeyo n’ukhootta weettihiwa ni Eroho Yowarya! Vano, Bibilia ohimmye wira Masu a Muluku t’otepexa wiitha onvikana xowa oniitha ninno ninno ankawanya makhua, nave annilamula miyuupuwelo sa mmurimani. Ayo, hata miyuupuwelo sa mmuruni!

131 Nto hiyo naaphentaka olumwenku wala itthu sa molumwenkuni, mphento wa Muluku khokhanle mwa hiyo. “Oowiihaniwa ari anci-ene, oothanliwa ari vakhani; okhala wira mukhora ti woophunyeya ni ephiro eniroiha mw’Ekumini ti yoorika, nave ale amphwanya ari vakhani. Anci-ene animoorwa wa Miyu nihiku nlo ekilaathi Moomweneni,” ohimmye ti Yesu, “n’Abrahamu, Isakhi ni Yakope. Masi aana a moomweneni

animoomoleliwa ota, yiire, ‘Pwiya, hiyo khaniirale ela mwa Nsina Nanyu? Hiyo khalilaleiye? Hiyo khanaari Totori *Lexe ni lexe* ni Reverendu *Lexe ni lexe*?’ Miyo nkinatoko woosuwelani. Mukhume wa Miyo, nyuwo muniira sootakhala, Miyo nkoosuwelani. Kahi othene aniira, ‘Pwiya, Pwiya,’ anookela. Masi ole oniira sintthun’aya Atithi Aka ari Wirimu, owo t’ule onkela.”

¹³² Nyuwo muri vo, mukelaka Muttetthe yoola wa natiri. Ninkela sayi memmo? Hiyo nrootthomeliwa yoowo. Ekereja, mwaha w’osuwela khalayi ene wa Muluku, yootthomeliwa (exeeni?) wa ntittimiho Awe, ni mahala Awe, wa ovuwa, ni okokhorela ni ovuwa wa Muluku. Paapa, okilanthe-ene wu wopaceryani, okhanle mmansawe, hat’etthu vakhiviru va Yoowo, aanitthuna etthu wira ekokhoreleke, tivo Owo khutthokiha khalayi ene ni khutthoma ekereja, ni ohinatthi opattuxiwa olumwenku, khuhela masin’aya muLiivuruni mw’Ekumi ya Mwaapwittipwitthi, okathi awo. . . iiviwe ohinatthi opattuxiwa olumwenku, wira awo ekhumelele wa ovuwa Wawe ni ottotopeliwa Wawe woomalelani w’okathi, okathi onrow’awe othukumanya itthu sothene mwa Mutth’ula mmosa, Kristu Yesu. Wau! Ovuwa! Ti yeeyo. Eyo paahi. . . Nto ti yeeyo vo, munn’aka mulopwana, muthiyana. Muhikhalakhale mukhumaka mwa Yeeyo.

¹³³ Muluku, ni mahala Awe oothanla, oowiihanani. Muluku, ni mahala Awe oothanla, ohooreerihani. Muluku, ni mahala Awe oothanla n’uwerya Wawe, ohoopatisani khookelihani muttetth’ola wa Omumula. Ale akenle Moomumulani mu aahiya othweelela waya. Awo aamaliha miteko saya ntoko Muluku simalinh’awe Sawawe. Awo aakhalana otthapa ohinlavuleya, ni woosareya ovuwa! Mwiri w’Ekumi onoophuwa mwa yaawo. Awo aakhalana wiisumaaliha, ophenta, oreera murima, ovilela oruhale waamini, waamini, omaala, oreera murima, ni sikina. Mwiri w’Ekumi onoophuwa mwa yaawo okhala wira nrromelo aya olimpe mwa Kristu Yesu, namoona a Eroho Yowarya okhalelaka onamoona ni ithoonyeryo ni mitikiniho sinaatthara alipa-oowaamini. “Ithoonyeryo iya sinimwaatthara ale anaamini.” Okathi anikelel’aya ohoolo, awo animwaavoniha aretta, anoowoomola axetwani, anooolavula ilavulelo, animoona soowoona. Awo. . . Ni anneetta ni Muluku, awo annilavula ni Muluku. Khaavo xetwani onwerya waattikinya, awo t’olipa, arowelaka e. . . ? . . . Eliyalaka itthu iye sivinre, annitthimakela omukaanoni wo wiihaniwa wuulupale mwa Kristu Yesu. Awo ari vo. Awo ari vo. Eyo ti Ekereja yeeyo.

¹³⁴ Awo akenle sayi mmo? Nyuwo muhiireke, “Ahe, Pwiya, Nyuwo moosuwela, nihiku nimosi miyo kaahipacerya waalya asikaro, vano khumora, nto kooni wira miyo kaa. . .” Oh, nnari, nnari, nnari, nnari.

135 Otthommwa! Owo oonihana nto okathi omutthanry'ahu p'ukathi hiyo nniir'ahu, "Muluku, hiyo naahirimeela ni naahikhwa. Hiyo khanaarina hata muupuwelo wo wiisopola mmansihu. Hiyo naari mukhalelo w'ekuluwe, hiyo naari ikuluwe opacerya wene."

136 Murowe munikhomani mwa kuluwe nto nwehe ekuluwe yoothiyana, mwiire, "Vano, nkaweha va, mwali, kintthuna kooleele etthu. Ti yoonanara nyuwo owurya nttoku."

137 Eyo yaamwiira, "Oink-oink." Munnona? Vano, eyo eri ntoko sirin'anyu wo wiisopola mmansinyu. Eyo ekeekhaii.

138 Nyuwo muniira, "Muhano, khimwaakhanle oowaraka ikuwo siiso, mwaahaana owara oratteene. Mwaahaana wira *ela*. Khimwaakhanle oorowaka o...Khimwaakhanle ookhalanaka maira ala a iturufu. Khimwaakhanle oowaalyaka asikaro. Khimwaakhanle wiiraka *ela*. Mwenye, khimwaakhanle oowiiraka *siiso*."

139 Awo aniira, "Oink-oink. Kiniira mpantta wa *Oink-oink*." Ah-ha. "Oink," eyo t'ile paahi ansuwel'aya. "Ahe, kinimoosuwelihani wira miyo k'oreera murima ntoko nyuwo siry'anyu. Oink-oink!" Moone, awo anookhootta weettihiwa ni Eroho Yowarya, maana Bibilia ohimnye wira mwaaphentaka olumwenku wala itthu sa molumwenkuni, mphento wa Muluku khokhanle mwa nyuwo.

140 Exeeni enaakhaliha oomeekh'aya? Nyuwo mw'atthu a nloko noowaarya. Mwiirale exeenii? Murookela mukhumaka muttetth'ole. Nyuwo muri Muttetthe mukina. Mukenle sayi mmo? Owo Muttetthe wa natiri. Enamuna xeeni ya natiri? "Enimwiiraneya wira mahiku ookiserya, onihimya ti Muluku, Miyo kinimwaamwaraxela Eroho Aka atthu othene." Mwa Eroho emosaru hiyo othene noopatisiwa mwa Muttetthe yoola wa natiri. Amen. Axinna alopwana n'athiyana, aleluya, ni ereerelo ya murima, woohikhala nrima, nnakhala owanani, hat'etthu! Khenikicala sinto munna mmosa orookhuma, hata wira iirale exeeni, nyuwo munoomurowela.

141 Miyo kaahimurowela munna mmosa woohikhala khalayi, aarookhuma. Mmiravo mmosa khukiirela, khwira, "Mmuhiye muthowa-naasi ule arowe. Mmuhiye mmansawe."

142 Miyo khwira, "Kakhalakhala-ru kiphiyereryaka nipuro murim'aka ohinkhal'aya saana ni munn'aka, weso p'ukathi wa miyo orowa waltari, okhala wira koomora mwa mahala." Miyo khwira, "Miyo kinoorowa vakhalaru wira owo ookhalana iphumu mw'erutthuni mwawe, nto kinoomuphwanya nipuro nlo mmukaanoni." Ayo, mulopwana. Nto miyo khumphwanya, aleluya, khimuttikiha. Ayo, mulopwana. Owo ootthikela salama munikhomani vano. Ayo, mulopwana. Owo aarookhuma khuthweelela vekeekhai.

143 Okathi vakhani ovinre vaamoonaly'aka mwamuthiyan'ole oowooniha othunku okilanthe-ene vale, nto mupiliisa khukiihana, khwira, "Vano, ole aahaana okhala muhina mw'ekamisa ya ikuru." Khwira, "Owo onookhwa-anepa paahi, owo woomupweteya muupuwelo awe." Owo—owo, awo yaamuhenle m'oteeli. Awo khurwa.

Miyo khwira, "Ti vootepa oreera."

144 Khwira, mupiliisa khwira, "Vano, Billy!" Miyo kinnimusuwela saana, ni kaanimusuwela okhuma waary'aka mwanamwane. Owo khwira, "Yaakhanle-ene etthu enwery'aka wira yowii kookhaliheryeni."

Miyo khwira, "Ti vootepa oreera."

Khwira, "Munniwerya omukhaliherya?"

Miyo khwira, "Nnari, masi *Owo* onniwerya." Miyo khwira, "Minuutu mmosa paahi."

145 Vano awo khimuruuha vate vale. Nto vakhumm'awe okathi vakhani ovinre, ni murettele. Yaari exeeni? Hiyo khuvahererya nivekelo mwaha wa yoowo. Amen! Owo aari oo. . .

146 Awo khwira, "Muntthuna omuruuha tothoro?" Khumwiirela iy'awe, "Muntthuna omuruuha tothoro?"

147 Khwira, "Tothoro khonwerya omwiiriha hat'etthu." Nto ti yeeyo. Owo oothatuwa anepa; tothoro khonwerya omwiiriha hat'etthu.

Khwira, "Nroromelo paahi ophiya *weiwe*."

Vano owo khwira, "Billy, miyo nkinsuwela saana yeeyo."

Miyo khwira, "Nkinwehererya wira musuwele, moone. Nkinwehererya wira musuwele."

148 Masi, oh, wulu, nnakhala miyo nkinsuwela! Nnari. Masi, munna, Muluku Wirimu. . . Miyo kaari ottaiwene, ottaiwene wu okathi mmosa, Etthu emosa khukirweela. Amen! Khawaari mwaha wo wira kiroothuna orwa, masi, nnari, Etthu emosa t'ekirwenle. Okhala wira ohinatthi opattuxiwa olumwenku, Muluku oroothoma, aleluya, wira hiyo naarowa okhala Awawe, wa nttittimiho Awe ni ovuwa. Nwiriyaane! Ale Owo aasuwenly'awe khalayi ene, Owo oowiiiriha exeeni? Oowiihana. Ekeekhai? Owo oowiihanani? Ayo! Owo oowiihanenleni exeeni? Owo orimoosuwelani khalayi ene. Ale Owo aasuwenly'awe khalayi ene, Owo oowiihana; ale Owo oowiihann'awe, Owo ohaakhaliha anaxariya. Eyo ekeekhai? Nto ale Owo aakhalin'awe anaxariya, Owo ohaavuwaha! Amen! Ti yeeyo Bibilia ohimmy'awe. Ale Owo aasuwenly'awe khalayi ene, Owo oowiihana. Khula nloko! Ale Owo oowiihann'awe, Owo ohaavuwaha. Exeeni? Mukihiye kosome Yoolepwa va. Vaareera.

Ohaathoma okhuma khalayi wira ekhale aana, mwa Yesu Kristu mwa yoowo, ntoko Yoowo Mwaneene suupuwenlyawe n'utthna wawe. . .

Wira nikhale oottotopela ovuwa Wawe. . .

149 Oh, munniwa saana yeeyo? Wira nikhale oottotopela ovuwa Wawe! Wira Owo awerye okilaathi vale mwa okathi Ohinimala onrowa otthikela orowaka, nto aana Awe ekhuwelele, “Abba, Tithi! Abba, Tithi!”

150 Nto Malaikha anrowa wira, “Awo anlavulasani? Awo anlavulasani?”

151 Yaahooniheriwa vooreera-vo mwa mwaana oohonona. “Miyo kaahirimeela.” “Ola mwan’aka. Owo aahirimeela vano oophwanyaneya. Owo aahikhwa, vano ookhala-tho mukumi. Mmuruuhe mwaanyompe oonenevexa, nlaya nootepexa oreera, anela munwarihe mukathani mwawe. Nto nrowe. . .” Khivanxankiha okathi ittheneeri iya s’oxaka siip’aya vamosa, aana a Muluku etthapaka mwaha w’otteeliwa murima, okathi yoonanse aya muteko wo woopola, Muluku ohelaka nsina nanyu muLiivuruni ohinatthi opattuxiwa olumwenku.

152 Vano nyuwo muniira, “Kalvino aanaamini etthu ntoko yeeyo.” Miyo nkimwaaminni Kalvino. Kalvino aari namwiiva. Kalvino aahimuhela mutthu mookhwani mwaha wa owo opatisa mwa Nsina na Yesu. Owo aari ootakhala murima, vaanitthuneya orukunxa murima, yoowo. Ayo, mulopwana. Masi etthu aahimy’awe, mwaha wa itthu kamosa-kamosa aahimy’awe, aahikhalana exariya. Muhi. . . masi etthu owo. . . Mwiirelo awe, mutthu onimwiiva mutthu mwaha w’etthu ntoko eyo, eyo ti yoowoopiha, eyo ti y’etampi. Vaareera.

Yaawo onivahalyawe voowaatta. . .

153 Oh, mulipelele, nkinaphiyerye “okhalihwiwa aana,” iwo koophiyerya? Nkireere wiileliwa? Nrowe noone etthu eroroco ela enihimy’aya osulu nno, okathi xeeni orin’ahu. Vaareera. Paahi—nrowe nikuxe minuutu muloko paahi mwaha w’atthu ala akhumme ottaiwenexa. Nkawehani. Nkawehani.

154 “Okhalihwiwa aana,” mukihye kiwooniheni mwaha wa xeeni enireliw’aya vano. Tithi orina omwene wuulupale, owo oneettiha ekhavallo aviraviraka. Vano owo ookhalana mwaana oyariwe. Oh, owo khoreere otteeliwa murima! (Owo ti Muluku.) Vano nyuwo moosuwela etthu tithi uwo oniir’awe? Owo onimphwanya mulipa-oolela ooreerelexa, mulipa-ookhapelela. Moosuwela ele okhanle mulipa-ookhapelela, khamunsuwela? Owo muxuttiha a exikola. Owo onimphwanya muxuttiha exikola ooreerelexa onwery’awe omuphwanya mulaponi mothene. (Vano nto hiyo nnoorowa vano, nwiriyane.) Nto owo onimuphwanya muxuttiha exikola ooreerelexa owo onwery’awe omuphwanya. Owo khonimuphwanya mulavilavi paahi, owo onthuna wira mmiravo awe akhale mutthu eekeekhai.

155 Nyuwo khamunaatthuna an'inyu siiso? Vekeekhai, yoomalela oreera eniwery'anyu waavaha! Ayo, mulopwana. Vano vakhala wira mutthu veephattu uupuwenle siiso, ankhil munuupuwela wira Muluku onuupuwela exeeni w'ana Awe? Yoomalela oreera Owo aakhanly'awe oophwanyaka.

156 Tivo, owo ommutthuna mutthu onrowa okhala a exariya. Vano, owo kahi mutthu...khommutthuna mutthu oniira, "Vano, nkawehani, miyo—miyo...Junior, mwiireke khul'etthu munthun'anyu wira, oophentiwa." "Oh, ayo, tithi, ah-ha, onnikelela ohoolo saana, owo mmiravo ooreerela." Onaakhela mweepettho ottuli wawe ni nttittimiho. Nnari, nnari. Mutth'uwo aamoomoliwa naanaano va. Vekeekhai. Owo ommutthuna mutthu onrowa okhala eekeekhai. Sinto mmirav'owo onneetta saana, amuhimeerye. Aaheetteke, amuhimeerye exeeni evonyeiye.

157 Nto vakhala wira tiithi a elapo ya vathi aanuupuwela yeeyo...Khimwaarowa otthuna wira mutthu akhaleke naxariya ni nyuwo, muxuttiha exikola akhale naxariya mwaha w'an'inyu? Vekeekhai. Ahe, munuupuwela wira Muluku onuupuwela exeeni? Ni Owo onnisuwela; hiyo nnari, Owo onnisuwela. Hiyo ninnimala, hiyo khanaakhanle oohiyanihaka. Masi Owo t'ohimala ni onnisuwela.

158 Tivo, moosuwela etthu Atithi yiiraly'aya? Awo khanahimyeke wira, "Miyo kinrowa omukuxa paapa wira aawehexaxeke an'Aka." Awo nnakhala khanahimyeke wira, "Miyo kinrowa omukuxa pi—pixipu." Nnari, nnari. Awo khayiirale yeeyo, 'okhala wira Awo yaahisuwela wira paapa aamurowa ovonya, siiso—tho ni pixipu. Munnona? Awo khanahimyeke wira, "Miyo kinrowa omukuxa mulipa-oowehexaxa aatthu othene wira awehexaxeke ikereja saka." Nnari, nnari.

159 Awo akunxe Eroho Yowarya. Eyo ti yaari Mulipa-ookhapelela Aya, ah-ha, wira yaaleleke an'Aya. Vaareera. Nto mwaarowa osuwela sayi wira Eroho Yowarya ennisuwela? Eyo enlavula mwa iyano sa mutthu. Munsuwela sayi nto wira Eyo enlavula Ekeekhai? Okathi onoonanyu Eroho Yowarya elavulaka mwa iyano enihimya Ekeekhai oratteene khula okathi, ehimiyaka ni ekhumelelaka oratteene, ntoko Samuweli siiraly'awe, vano munoosuwela wira Ekeekhai. Enoorwa oratteene. Okhala wira Muluku ohimmye wira, "Owo alavularu nto enihimiy'awe khuhikhumelela, muhimwiiwe, 'okhala wira Miyo nkikhanle n'uwo. Masi yakhumelela, ahe, vano mmwiiwe, 'okhala wira Miyo kiri ni yoowo." Munnona? Eyo eri vo. Ti siiso Awo aniir'aya.

160 Vano, nto Eyo enooviravira. Vano, exeeni munuupuwel'anyu wira Mulipa-ookhapelela owo aamuhimya vaakhanle wira Owo aahaana orowa w'Atithi? Ni wira, "Ani—An'Inyu anniira

ithu vootepa onanara. Miyo kinimoolelani, wira mmiravo Anyu ule, owo, hum, owo oohiya waamini. Owo namweettasa pure, nkinamooneke mutthu siisaale! Wulu, Nyuwo moosuwela eniir'awe? Ni mwali Anyu ule! Oh, wau, nkisuwenle exeeni Nyuwo enrow'anyu omwiiriha yoole. Hmm. Ahe, Nyuwo moosuwela? Owo onkhala wira owo. . . Owo othene t'owiipintari ntoko aximwali kamosa-kamosa ale iwe. aFilisti. Ayo, Napwiya, owo onttuna aireke ntoko ale siiniras'aya."

"Mwan'aka mwaamuthiyana?"

161 "Ayo, mwan'Inyu mwaamuthiyana." Ti yeeyo Eroho Yowarya erin'aya ohimya mwaha w'ekereja olelo. Khivanxankiha hiyo ohikhalanaka muhakalaliho. Munnona? Vano, eyo ekeekhahi.

"Ankhi mwan'Inyu mwamulopwana? Hah? Etthu emosaru."

"Exeeni?"

162 "Ahe, Nyuwo moosuwela Nyuwo moohimya kweekwe wira ipwittipwitthi iye saahaana osukihiwa osulu iwe vaYolyani ya ipwittipwitthi osulu iwe. Ayo, Nyuwo moosuwela etthu iiraly'awe? Owo oroihale ohitto iwe vanikutthani va suruma vale. Orookuxa paahi aroiha ohitto iwe khumwaraxela sothene iye mmurathini mme, khuhiya sirupaathale-ene vanikutthani vale va suruma, simuly'aka salkeero ule a khalayi, vano iyo soohaawaseya sihinwery'aka okhuma vale." Awo ti mapixipu, mapastore ankhotta Owerya nave. "Ahe, miyo kinoolelani ekeekhahi, miyo nkinatoko woona nikhuru na ipwittipwitthi soonanariwa mwa makhalelo Aka." Owo khenimusivela eyo. Nnari. "Nto Nyuwo moosuwela? Inyompe iye osulu nno, Nyuwo moosuwela Nyuwo—Nyuwo mwaahimeeryale wira silyeeye v'a—v'alufaafani vale osulu iwe, Nyuwo moosuwela, wira oneneviheke?"

"Ayo."

"Nyuwo moosuwela etthu owo onivah'awe?"

"Nnari."

163 "Malaxi ale a yuuma. Ayo. Owo oniiriha iyo wiitakaniha ni maloko ni ithu sothene. Nyuwo khamunatoko woona siiso mwa makhalelo Anyu. Nyuwo khamunatoko woona etthu ene yeeyo mwa makhalelo Anyu othene. Nyuwo moosuwela etthu oniir'awe? Onookhuma arowaka iwe amulyaka soona muulupale, oowiisoona. Owo ori n'amwaar'awe ni yoowo, awo anwanre kaputtula ntoko aFilisti siniir'aya iwe. Ayo." Eyo t'inamuna ya muhupi Eroho Yowarya erin'aya okuxa wa ekereja olelo. Vano, munuupuwelani wa yeeyo?

164 Eyo p'ukhalihwiwa aana. Exeeni Awo. . . Awo yiiraly'aya? Awo aroonitthoma hiyo—hiyo wira nikhale aana. Awo anivanhe Eroho Yowarya; masi, mulipelele minuutu mmosa, okhalihwiwa aana, ti yeeyo enihimy'ahu. Okhalihwiwa aana!

165 “Ahe, Nyuwo moosuwela eniir’awe? Pixipu aahirwa nihiku nlo, nto khuhimya. Owo aarina muteko mwaamukhaani w’ovoniha ohitto iwe, nto pixipu khurwa. Mulopwana mmosa, munna mmosa khurwa nto aavekelela aretta. Nto owo khwira, ‘Nyuwo munteerye eyo!’

“Oh, oh, ayo, tiithi piixipu, kinimwiira yeeyo.’

“Muhikhaliherye.’

“Oh, nnari, nnari, tiithi pixipu, vekeekhai nnari.’

166 “Nto va Miyo kinoorwa n’umuhimeerya Ekeekhai enikhuma mwa Masu Anyu. Moone, Ala ari va. Miyo kinnimusomela ikano Sanyu oratteene etthu yo wira, nto owo khonthuna wiiwelela seiyo. Owo iirale, ‘Oh, eyo yaari y’okathi mukina, mwaana mukina mwa okathi mukina. Eyo khenikihimya miyo.” Eyo eri vo. Eyo, vano eyo Ekeekhai, mpatthani. Vano khamunoono vathu ekereja eniyelel’aya okhalihwa w’aya, xeeni hiyo ehinkhalan’ahu muhakalaliho, xeeni ehinkhalan’ahu itthu siireyaka? Ti vaavo vary’aya.

167 Yoxuwa oniira, “Kati, kintthuna wira mu...vaava va t’umphwanyaneya opuro anyu nittharihaka ethokiheryo, opuro anyu omphwanyaneya va, vaava va. Nkele va, Kati, nto mukhale vaava. Peniyamini, nyuwo murwe ohitto nno. Nto vano nyuwo othene murakamele mwiinano w’aFilisti.” Nto Yoxuwa onoohokolowa, va awo othene w’aFilisti, arine-ene niira nuulupale, yiinasaka paahi siiso, ni athiyana othene oowiipintari, ni yiinasaka ni evirihaka okathi muulupale. Vano Yoxuwa onsuna muru awe, ni wira, “Vano exeeni?” Vano eyo t’ile vekeekhai eniiraneya; kahi othene, mahala a Muluku, kahi othene, masi anci-nexa. Vaareera.

168 Vano exeeni eniiraneya nto? Ti yeeyo yaakhumelenle. Khamunthokelela wira Mutth’uwo, Eroho Yowarya, ennuuliwa muru ohoolo w’Atithi okathi Eyo erin’aya ohimya yeeyo? Oh, wulu! “Miyo—Miyo—Miyo koomuleela, masi owo—owo—owo khaatthuna wiiwelela Yeeyo. Miyo koomuleela eyo, ni koomuhiya osoma mu muLiivuruni. Miyo kaahikhalana—Miyo kaahikhalana murumeyi mmosa mwaamukhaani aarwiiye khumooniha wira Yesu Kristu mmosaru nsana, olelo, ni mahiku othene. Nto Nyuwo moosuwela? Owo khumuhiya mmosa w’ale—mmosa w’amakhampusi ale a ipuri orwa va khimuleela wira eyo yaari y’okathi mukina. Munnona? Vano owo aaninkha saana okathi orwiiy’awe vale, ni muhiriri w’epuri, Nyuwo moosuwela, asikaro, ni Nyuwo moosuwela, ni sikina, aaninkha saana okathi orwiiy’awe va. Munnona? Masi Miyo kinimooleelani, makhampusi ule a ipuri aahikhalana mitaalya soophiyerya sawarihiwe mwa yoowo, maana, Miyo kinimooleelani, vaakhanle wira Nyuwo mwaamulepa nsina nawe vapapheloni, yaamutthuneya (soohimmwa vanookhwani vawe) yaamutthuneya nuusu n’epaphelo wira siheliwe ititiulu

sawe. Ayo, Napwiya, vekeekhai owo onnisivela iwe epant'ele iwe, masi, Miyo kinimooleelani, owo vekeekhai khonsuwela moota w'olyiha ipwittipwitthi. Eyo t'itthu emosa ya yeeyo. Owo vekeekhai khonththuna okiiwelela Miyo," enihimya Eroho Yowarya. "Kaahitthuna omuleela wira Nyuwo mwa mmosaru nsana, olelo, ni mahiku othene, masi owo—khonththuna wira. Owo ti namoova muulupalexa Miyo otonko aka omoona mwa makhelelo Aka. Ayo. Nto ekereja yoomukhaliha mulipa-oowehexexa, pixipu, siiso, atthu othene animwiiwelela yoowo. Vano nto Nyuwo moosuwela? Awo ankuxa iye...awo aakhalana etthu yaamukhaani iwe aniihan'aya 'televisawu.' Munoopattiha etthu yaamukhaani ntoko yeeyo, nto—nto athiyan'awo animoorwa ni wira itthu, mithinto sothene sa ivestiitu sookhuvéya. Nto, Nyuwo moosuwela, anci-ene wa an'Inyu axithiyana anoota- . . ."

"Oh, vekeekhai nnari!" Munnona?

169 Aniira, "Ayo, awo anniira. Ayo, awo aniira yeeyo. Hmm. Akina w'awo aninlela muhakalaliho, Tithi, akina w'awo vekeekhai annitthuna. Akina w'awo vekeekhai anneetta oratteene, akina w'awo anikhala voororomeleya mwa Masu awo ntoko sinwery'aya okhala. Akina, Miyo nkinsuwela yo wira, awo ari—awo ari ottaiwene iwe. Nyuwo moosuwela etthu aniir'aya ale akina? Animwaatheya, yiiraka wira, 'Awo nikhuru n'alolo paahi."

"Ahe, eyo ennikooniha Miyo owereya saana."

170 Masi vano nrowe nirukunxe elatarato. Vano Atithi, mwan'Aya mmiravo ooreerela. Atithi awe okathi—okathi wothene, va ori Mulipa-ookhapelela, Eroho Yowarya. Epantte Eroho Yowarya, Eyo yiirale, "Kinrowa weetta," Mulipa-ookhapelela oohimya, "Kinrowa . . ."

171 Mwanamwane iirale, "Miyo kinimweetta ni Nyuwo. Miyo kinoorowa ni Nyuwo."

"Oh, mwaako khoreere orekama, mwan'aka."

172 "Miyo kinoorowa ni Nyuwo. Miyo kinooromelani Nyuwo. Kapacerya okhulumuwa, Eyo enoovenxa ntata naka ni enookivarelela."

"Masi aakhala akharamu osulu vamwaako vale!"

173 "Khiva mulattu vakhalaru wira Nyuwo muri vakhiviru, khivanvirikana hata vakhani. Miyo kineetta kirowaka ni Nyuwo."

"Sookhala mikattyamiho vasulu vale, maluku oothererya."

174 "Nkincala, vakhalaru wira Nyuwo munivarela ntata naka, miyo kinimweetta ni Nyuwo. Miyo kinimweetta ni Nyuwo."

"Oh, moosuwela? Atith'inyu yaaniiraka yeeyo, moone. Eyo ti yooreera. Ayo, mulopwana."

175 Welakani vasulu vamwaako vale. “Oh,” Eyo yiirale, “Nyuwo moosuwela, Tithi? mwan’Inyu vekeekhai onikhala ntoko paketi okhumme vaniphalapasi. Owo voomalela, vekeekhai ori ntoko Nyuwo. Masu othene Nyuwo munihimy’anyu, owo oniira ‘amen’ wa Yaawo. Miyo—Miyo kaahimuleela wira omukhunle Bibilia nihiku nlo, nto Owo aahimya wira, ‘Yesu Kristu mmosaru nsana, olelo, ni mahiku othene.’ Nyuwo moosuwela etthu aahimmy’awe? Owo aarookhuwela khookolela matat’awe osulu, khwira, ‘Aleluya! Amen!’ Oh! Ni Nyuwo moosuwela wira Awo aahimya va, mwa—mwa Masu Anyu, Nyuwo moosuwela, vaavo Nyuwo muhimaly’anyu wira, ‘Miteko, ole onikaamini Miyo, miteko sinvar’aka nave-tho owo onoovara?’”

176 “Ayo, Miyo kinnuupuwela wira koomulepela Yeeyo mwan’Aka. Ayo, Miyo kinuupuwela wira koolepa Yeeyo.”

177 “Oh, okathi owo oonaly’awe, owo orookhuwela paahi khutupha osulu ni vathi, khunyakula, ‘Aleluya, Pwiya. Mukumihe olumwenku wothene mwa miyo. Mukikhalihe Siiso!’ Ayo, Napwiya. Ni itthu sothene iye owo iiraly’awe!”

178 “Oh,” Atithi aahimya, “Miyo ko—Miyo kootteeliwa murima mwaha wa mwaan’owo. Owo mwaana ooloka. Vaareera. Mmuwehaxexe iyaakha vakhani, moone moota owo—moone moota sinrow’awe, ni moota onikelel’awe ohoole.” Nuuvira okathi vakhani iyaakha sinoovira, “Oneetta sayi?”

179 “Oh, wulu, owo onimunnuwa mwa mahala! Oh, wulu! Owo paahi. . .Owo onimweetta mutakhwani. Miyo kinimooleelani, owo—owo vekeekhai ti. . .Vano, owo onikuxa ipwittipwitthi iye, onniwerya osukiha siiso—siiso ntoko Nyuwo siniir’anyu. Owo khankhalakhala avahaka namalele a mphareya. Owo khankhalakhala avahaka malaxi a yuuma. Okathi sinrw’aya, siiraka ‘ninthuna wiitakanxa mukereja’; owo oniira, ‘Maalani, khentthuneya yeeyo! Nnari, mulopwana. Ela t’itthu entthun’anyu, “Murukunxe murima mpatisiwe, khula mmosa a nyuwo, ni Nsina na Yesu Kristu, wira muleveleliwe itampi sanyu. Munimwaakhela yoovaha ya Eroho Yowarya.”’ Ayo, Napwiya, ti yeeyo owo ohimmy’awe.”

“Oh, khweeli owo onihimya yeeyo?”

“Ayo, Napwiya, vekeekhai onnihimya.”

“Ahe, ti siiso Miyo kilepaly’aka Yeeyo.”

“Vekeekhai ti siiso owo onihimy’awe Yeeyo.”

“Hmm!” Ayo, Napwiya.

180 “Akina w’awo yiirale, ‘Nyuwo muhaleke mmuttettheni m’oYerusalemu mpakha waakhela owerya onkhuma Wirimu. Okhuma okathi Eroho Yowarya enookhuruwel’ayani, munookhala anamoono Aka oYerusalemu, oYuteya ni oSamariya, mpakha onimalel’aya olumwenku.’ Okathi osomaly’awe yeeyo, aahikhuwela, ‘Aleluya, ti yeeyo

entthun'anyu!' Moosuwela etthu oniir'awe? Owo onimwaaroiha mpakha ohitto iwe mpakha awo waakhela Eyo, ti yeeyo tu, onikhala ni seiyo.

181 "Vano iyo sapacerya wiisinliha, owo oniira, 'Eh, eh, eh, nwehererye minuutu mmosa, nwehererye minuutu mmosa. Eyo t'inamuna ipuri siniir'aya, kahi ipwittipwitthi. Munnona? Munnona?' Oh, imaara kamosa-kamosa iyo sinnimunareela, masi owo ntoko ommana vakhani ottuli, khwira, 'Nwehererye minuutu mmosa, sh-sh, sh-sh, sh. Vaareera.' Owo vekeekhai onnisuwela moota wo weettiherya ipwittipwitthi iye. Ayo, Napwiya, Miyo kinimooleelani.

182 "Nyuwo moosuwela? Kaahimoona Pixipu muulupale *Lexe ni lexe* amuhimeeryaka wira owo 'khaakhanle oorwaaka epoom'ela okhalana muthukumano.' Masi, Nyuwo moosuwela, Miyo khumweettiherya mwa enamuna emosa, Miyo khwira, 'Rowakani khula enamuna.' Munnona? 'Mukumihe misako iya, ni muhihiye sirowaka.' Hiyo khurowa mwa khula enamuna! Khurowa ipooma iya nno, khwira, 'Ahe, hiyo khaninrowa okha-...'

183 "Nto Nyuwo moosuwela, xetwani khurwa mpakha weiwe, khwira, 'Kinoolipiheryani Nyuwo wira kinniwerya waakhaliha ota w'epoom'ele.' Miyo khwira, 'Khamunwerya wira. Miyo kamuhimeerya-ru wira orowe, owo onoorowa. Miyo kinoolipiheryani wira onoorowa.' 'Nnari, nnari, nnari, nnari, nnari, miyo kinoomuleela. Kinoorowa ohitto iwe kiire, "Vano, anamuteko aka othene, muthukumane vamosa. Khamunthunasa hat'etthu y'onamathipelel'owo wa khalayi ohitto nno, ovoniha wotheene iwo wa Muluku ni itthu iyo sa Eroho Yowarya. Eyo emanle khalayi n'arummwa soovira iyaakha. Nyuwo moosuwela wira eyo kahi yooreera, ottuli wu.'" Eereryaka ovaha malaxi ale a yuuma, itthu sothene ntoko yeeyo. Iyo...

184 "Masi, Nyuwo moosuwela, owo aahirowa iwe mwa khula enamuna. Aahirowa mpakha iwe khupacerya omukumihamo alufaafa, mu... Nto Nyuwo moosuwela, ipwittipwitthi iye khupacerya olya, iyo sinooneneva ntoko sinwery'aya. Ayo, Napwiya. Okathi sinkhalan'aya ovonihiwa ni mithukumano ni, Nyuwo moosuwela, anci-ene w'aximiravo ale khupacerya. Vano, awo khoonasa wira yakhalana-ru nikuttha nuulupale na malaxi ntoko alufaafa ole. Nyuwo moosuwela etthu amwiirihaly'aya? Aari ooreera mpakha awo otthimakasa erowaka w'anamaitthoko, khwira, 'Nkalawihani Ila! Nkalawihani Ila! Nkalawihani Ila!' Moone, mukhalelo ene iwe waasiva ntoko ola nno. Ela eri va. Ela eri vaava va, moone. 'Murukunxe murima paahi, khula mmosa a nyuwo, mpatisiwe ni Nsina na Yesu, moone, munimwaakhela Eroho Yowarya. Ti ya khula mutthu ontthuna, arwe, arwe va oone ele Bibilia

ehimmy'awe.' Munnona? Nto awo anviriha okathi muulupale ohitto iwe."

185 "Oh, owo ti mwan'Aka! Owo ti mmiravo Aka. Ahe, Nyuwo munoono wira oottokottha saana?"

186 "Ayo. Vekeekhai ti siiso," yoohimya Eroho Yowarya. "Miyo koomuviriha moweereriwani. Wulu, Miyo koomweererya so, khumweererya *saale*. Koommoroxa, owereiwa, koomuriipihale murima. Miyo koomunyakelasa, koomuhiya xetwani omwiiriha khula etthu aawery'awe omwiiriha, owo aamuvenya-tho. Owo aamoorwa siisaale. Moone, aamuvenya-tho. Kommukhaliha muretta. Miyo kiihira *ela*. Koomukhaliha oxipiritaali. Miyo koomuroiha ota nno khwira *ela*, khwira *ele*. Kihaarukunxa amwaar'awe emuvirikanyaka, kihaarukunxa anamaitthoko awe emuvirikanyaka, koorukunxa itthu sothene. Eyo kheruuhale hata evirikanelo. Khwira, 'Hata Awo ekiivaka, miyo nlelo kinimwaaroromela.' Miyo koowiiva amusi awe. Kookuxa *ela*, kiihira *ela*, kiihira sothene *iya*, kiihira *ela*, *ele*, *ekina*. Owo nlelo khuvanya naanaanoru, 'Hata Awo ekiivaka, miyo nlelo kinimwaarumeela! Awo t'awaka!'"

187 "Oh! Ahe, kookupali wira Hiyo naahaana omwiihana nipuro nlo nipuro naamukhaani n'omeekhaaya nikhalane omukhaliha mwaana."

188 Vano, okathi tiithi, Waataana Wa Khalayi, aasuwel'awe wira mwan'awe aahiphiyerya wunnuwa, ni wira aahittokottha wira okhalihawe mwaana. Wira! Awo aniyariwa ery'ene aana, masi, awo aana okathi ene yoowo. Masi nto awo kharowa-tho okhalana aana paahi, mwaana pure paahi, mpakha awo ottokottha khooniherya ele akhanly'aya. Vano, owo onoomwiihana nto.

189 Vano hiyo nri va, ekereja. Nyuwo moolikana? Vano vahooxa vakhani, atthu othene mulume ikatha sanyu, mutiine munep'anyu, muhakalalihe murim'anyu, minuutu mmosa paahi. Munnona? Vano ninrowa okhaliha ekereja voopuroni. Vano okathi ekereja emphiy'aya nipuro nenlo, Owo oniira, "Manase, nyuwo mwa a va. Efrayimi, nyuwo va."

190 Vano owo onoomukuxa omuroihaka nipuro nimoso, tiithi onniira, nto khimuhela nipuro noottukhuwa ntoko nla, vano owo onkhalana niira, nto atthu othene anoothukumana. Nto owo khwira, "Kintthuna wira atthu othene esuwele wira ola ti mwan'aka, nto kinnimukhaliha mwaana mwan'aka. Ni kintthuna wira khula mutthu asuwele, okhuma vano mpakha ohoolo, wira nsina nawe...Miyo kinimuwaraha, ekuwo y'omeekhaaya. Ni kintthuna wira musuwele wira nsina nawe nnookhala saana mwa khula exeeke ntoko nsina naka nnikhal'aya. Owo ti mwan'aka, kimmukhaliha mwaana mw'emusini mwaka, onamwi ory'ene mwan'aka okhuma oyariwa wawe. Okhuma okathi waakhenly'awe Eroho Yowarya,

owo ti mwan'Aka. Masi vano Miyo kinrowa omukhaliha voopuroni mwa oruma. Ole onimoomol'awe ohoomoliwa, ole onimulep'awe muteko oolempwa:

191 “Nto vekeekhayi, vekeekhayi, Kinooleelani wira, mwairela mwiri ula, mwairela mwaak'ola, 'othaame-vo,' muhihoveryaka mmurimani mwanyu, masi mwaaminiki wira ehimmy'anyu enimwiiraneya, munimwaakhela ele ehimmy'anyu.” Munnona? Eyo eri vo; eyo eri vo. Munnona? “Owo ti mwan'Aka.” Akavi answela wira okhalihwa mwaana, wira e...awo yaamukhaliha mwaana vaamal'awe wooniheriwa okhala e... Atthu othene atonko omusoma Bibilia, omukhaliha mwaana voopuroni.

192 Vano, Muluku aahimwiiraha etthu emosaru Mwan'Awē okathi Owo aamukunx'awe Yesu amuroihaka Vamwaako w'Orukunuwa. Owo aamukunxe Petru, Yakopo ni Yohani osulu iwe, awo t'anamoona araru a elapo ya vathi. Vale aari Yesu, Moise n'Elia, ni Muluku, vasulu vamwaako. Awo yaaphwanyaneya vale vamwaako. Nto, naanaanoru, awo khuweha, nto Yesu aahivuwihwa ohoolo waya. Eyo ekeekhai? Akavi answela wira eyo ti Yoolempwa? Exeeni Owo iiraly'awe? Owo—Owo aamuwarinhe nlaya na ohikhwa. Nto owo ohimmye wira, “Ikuwo Sawe saamwaarya ntoko nsuwa.” Eyo ekeekhai? Vano neeku naahaakhuneela. Nto Petru ni Yohani n'akina, khumora yiipopheyaka. Vano awo khuweha, nto vale aaphwanyaneya Moise n'Elia, elavulaka ni Yoowo. Nto Moise iira okhwiye-ene, khuvithiwa vamahiye vookikwerethiwa mwa iyaakha imiya thanu na ttharu. Nto Elia aawenle ekaaro khurwa Wirimu, iyaakha imiya thanu eyo ehinatthi. Wau! Masi awo nlelo yaarisa vaavale! Awo yaarisa vale elavulaka ni Yoowo. Moone, Owo aahimuroiha Yesu osulu wira owoone, wira yaari exeeni yothene eyo, wona vale, omoonihwa Yoowo itthu iya. Vano awo khulavula ni Yoowo, yaahivaneelasa ni Yoowo.

193 Nto Petru vamanly'awe oweha-tho ottuli nto ovuwihwa waahimukhuma Yesu, awo yaamonne Yesu paahi, nto Nsu nimosa khukhuma mmeekuni mme, khwira, “Ola ti Mwan'Aka onimphentex'aka, mmwiiweleleke Yoowo! Nsina Nawe ti nooloka ntoko Nawaka vano. Mmwiiweleleke Yoowo!” Ti yeeyo, okhalihwa mwaana, wala aana ookhalihwa voopuroni.

194 Vano, ti vaavo Muluku onesery'awe opixa ekereja Pentekosite muLiivuruni mwa aEfeso. Munnona? Nyuwo, nyuwo munniiwa saana? Nihaana omaliha okhala wira onootepa wiila, moone, anamwane aapacerya ovoliwa ikhove. Nto miyo kaatthuna kiphaye va eversiikulu ila va, masi nkikhanle oophiyaka, mpakha e—eversikulu 13, moone, epantte yookiserya, “oottthitiwa ni Eroho Yowarya yaalaiheriwe.” Nnoophiyerya yeeyo Ttiminku, moone. Nkawehani. Vano, moota, exeeni ennikelihwa, ni moota onsukiw'ahu ni Yeela.

¹⁹⁵ Masi vano “okhaliha voopuroni,” muniheliwa sayi? Nyuwo munipacerya oyariwa Moomweneni ni Eroho Yowarya. Akavi ansuwela yeeyo? Vaareera. Yoottharelana, nyuwo mutthomeliwe exeenii? Okhalihiwa aana. Exeeni iyo? Nyuwo murootthommwa wira mukhalihiwe voopuroni.

¹⁹⁶ Oh, Munna Scott muthiyana, kookupali wira ti yoowo, okilante va. Khamuhiyo nyuwo mwaari owaani iwe olelo? Wookhala mwiixuttiho onivira nipuro nlo molumwenkuni, mapuro oohiyana-hiyana mulaponi, kinniiwaka ohimmwa yoowo, imaara sinci-ene, wira Yesu ori mu elapo ya vathi, eettaka mw'erutthuni, Owo onoophiya ni wira *ela*. Eyo ti yoowoothiwa! Eroho Awe Yowarya eri vaava, nto Owo oneserya okhaliha Ekereja Awe voopuroni, okhaliha Ekereja Awe oratteene, okhaliha mMuttettheni wa natiri, wira awo ewerye okela... wira awanani othene yoomoleliwe ota.

¹⁹⁷ Manase khonwerya okuxa muttetthe awe. Miyo nkinwerya okhalana muteko w'ovoniha okathi nuusu na...okathi e... Miyo kinookhuma n'ulaleerya opatiiso ni Nsina na Yesu Kristu, nto a—nto axinna a oraaru aniira, “Oh, awo t'aYesu Paahi.” Ni nkinwerya orowa nno n'ukhalana ovoniha wa Muluku okathi nuusu na yaawo aniir'aya, “Ovoniha wa Muluku ti wooreera,” ni anci-ene a yaawo sinnaasivela miiriirya s'Apwiya ni wira, “Ahe, kinnaamini wira Munna Branham profetaa, masi mukihye kooleleni etthu. Okathi Eroho enkhal'aya mwa yoowo, ni athokereryaka, owo murumeyi a Apwiya. Masi Mwiixuttiho awe ti wootakhala, Owo kahi wooreera.” T'ani otonko wiiwa ololo ene yoowo? Owo ti wa Muluku wala kahi wa Muluku. Ti yeeyo. Owo othene Mulukuu wala khiivo eri Muluku. Ti siiso siry'aya. Masi munrowa okhalana sayi? Manase khonkhapelela nipuwa nawe, Efrayimi khonkhapelela nipuwa nawe, Kati khonkhapelela nipuwa nawe, Peniyamini khonkhapelela nipuwa nawe, othene aya anootthimakasa ota nno n'aFilisti, nto othene aya t'otakanxeya. Ninrowa okhalihiwa sayi voopuroni? Masi hiyo nooyariwa ni Eroho Yowarya, othene hiyo. Eyo ekeekhaii? Niyareliwe exeeni? Ootthommwa... Vano vamanly'ahu oyariwa, hiyo nootthommwa wira nikhale aana, wira nikhalihiwe mw'Erutthuni mwa Kristu. Munnoona enihimy'aka?

¹⁹⁸ Exeeni Erutthu ya Kristu? Akina arummwa, akina maprofetaa, akina awiixuttihi, akina amalaleya ehapari, nto akina amukukhula. Eyo ekeekhaii? Hiyo niniitthaneliwa yeeyo. Akina aakhalana yoovaha ya ilavulelo, otaphulela ilavulelo, osuwela, ankhili, miiriirya, opaka miiriirya, soovaha iya sothene soohiyana-hiyana. Nto vano awo yiirale exeenii? Awo aroopaka eyo vakhani. Exeeni? Aroohiya eyo khutaphuwa ntoko kahi exeeni. Mmosa onoovenya, khulavula ilavulelo, nto ole mukina onookelela ohoolo, alavulaka, “Blrr, blrr, blrr, blrr, blee” Ah-ha. Mulaleyi onookhala alaleyaka, khwiihana waltari, nto

mutthu onoovenya, onalavula ilavulelo ni “Aleluya, avuwihawe Muluku.” Vakhala wira—vakhala wira enimwiiraneya mulaleyi okelela ohoolo ni mutthak’awe, oryeene ooreerihiwa, nto atthu aniira, “namuhiya waamini.” Moone, mwaha wo wira awo khaniixuttihiwa.

¹⁹⁹ Bibilia ohimnye wira erooho ya maprofeta enimwiwelela profeta yoowo. Muluku kahiyo mwaneene manyakunyaku. Okathi oneemel’aka va, wala murumeyi va vathi va mureeriho wa Muluku. Hata munthuna olavula sayi ilavulelo, mmaale mpakha Muluku omaliha va. Nto mwalavula ilavulelo, ehikhaleke otthikela Yoolepwa, ’okhala wira Muluku ohimnye wira muhaattiheke ithu soohikhala maana. Masi onikhala mutthaka onimulukama mutthu. Mukikohe emaara emosa, mukithoonyerye emaara emosa Eroho Yowarya etonko aya, vathi v’othokererya, omuleela mutthu, otthikela Yoolepwa emaara emosa n’ekina. Eyo yaahimeerya etthu yaavonyeiyi n’awo ni etthu awo yiiraly’aya, ni etthu yaatthuneya wira yiire wala etthu yaarowa wiiraneya, wala etthu siiso. Eyo ekeekhaii?

²⁰⁰ Ti siiso ery’aya olavula ilavulelo n’utaphulela! Akhala mmosa mukereja onlavula ilavulelo, mukina khunataphulela, ehimye yeela. Nrowe niire Munna Neville onoovenya n’ulavula ilavulelo, nto munn’ola va khunataphulela, wira, “Mmuleele mulopwan’ola va wira nsana aahirowa nno khwira etthu yahaatthuneya owo wira. Vano tothoro oomuleela olelo wira ookhalana kankuru. Orowe alokiherye etthu ile, atthikele vaava ailokiherye ni Muluku.”

Mulopwan’owo ni wira, “Khweli, eyo ekeekhaii.” Vano Muluku ori ni nyuwo.

²⁰¹ Masi hiyo ninrowa wiirha sayi siisa? Munnona? Enikhala paahi, “Blmp, blrr, blrr, blrr.” Vootapaneyya paahi, khula enamuna, ohikhalihwi wa voopuroni hata vakhani. Vano eyo ti. . . Moone, aEfeso, aneererya. . . Moone, awo anooyeleela eyo. Munnona moota aniyeelel’aya? Hiyo nroothommwa wira nikhale aana! Vano akavi aniirwa saana enihimya’aka, nvenxe ntata. Okhalihwi aana! Hiyo nooyariwa mwa Eroho ya Muluku, vekeekhai, nihaakhela Eroho Yowarya, nto ninookhuwelela, “Abba, Tithi! Aleluya! Avuwihawe Muluku!” Hiyo na yeeyo, eyo ekeekhaii, hiyo n’ana, masi khaninwerya ophiya hata vatthu. Khaninwerya waxintta aFilisti.

²⁰² Nkanweheni Billy Graham eemenle-ene iwe. Nto Mmak’ole iiraka, “Mooniherye!”

²⁰³ Nkanweheni Jack Coe emeenle-ene iwe. Nto nammukhotta Muluku ule, Ekerejele ya Kristu evahanaka mukhono ni nammukhotta Muluku ule iwe, ni evaranaka ntata. Anihimya okhala muKristu, nave evahanaka mukhono ni xetwani ntoko Joe Lewis, namuupuwela ootaphuwa, ni hata aanveehale Muluku khwira “khiyaakhanle etthu iyo ntoko Muluku,

khula enamuna, opacerya wene,” ni itthu ntoko seiyo. Ni ekereja eniisiihana ekereja ya Kristu, evahanaka mukhoni ni yoowo, ni ekhalaka mpantte w’omuvirikanya Munna Jack Coe. Ninrowa wira sayi etthu? Ni aPentekosite, anci-ene aya, annimuvirikanya yoowo; okathi, khula mulaleyi mmuttettheni mwahu vaatthuney’aya weemela ekatha ni ekatha ni yoowo, ni wira, “Muluku, nveleelihe Owerya Wanyu.” Moone, hiyo nri vo, vahinweryaney’aya okhalihiwa vooপুরoni.

²⁰⁴ Efrayimi khonththuna okhala. Mmosa w’awo onoorowa nno, nimphwanya wira Manase onrowa nno, wira, “Oh, wulu, Apwiya aakivaha ematta yooreera ya nakhuwo!” Vano va onoorwa va, Kati, khwira, “Ahe, vano, nwehererye minuutu mmosa. Kihaana omulima aveya, masi kinrowa omukuxa nakhuwo nave. Aleluya!” Munnona? Nyuwo khamurina naata ni nakhuwo; mmukuxe aveya, aveya ti mpantte anyu wira mmulimeke. Khivanththuneya nyuwo ohuwa ipwittipwitthi eryeene wira muhuweke inyompe. Muluku onththuna okhalihā ekereja vooপুরoni. Masi khula mmosa w’awo antthuna yiireke etthu emosaru. “Aleluya!” Ni khivanweryaneya waahimeerya etthu mwaha wa yeeyo. Nnari, nnari. Awo nlelo arina mukhale’ole w’epuri, “Bhuh, bhuh, bhuh, bhuh, bhuh, bhuh, bhuh.” Moone, khivanweryaneya waahimeerya. Eyo ekeekhaii. Vano, kahi ekeekhaii? Nto nyuwo khamukhanle ookhalihā ekereja vooপুরoni. Munnona?

²⁰⁵ Ekereja ehaana okhala yoothommwa wira ekhalihawe aana, vaavo mutthu... Muluku okhanly’awe oomukuxaka mutthu khimukhalihā mwaana mw’emusini, ni onvaha etthu. Wira, yoopacerya, mutokose eyo moone sinto ti ekeekhai. Bibilia ohimmye wira muthokoseke erooho. Mutth’ula onihimya etthu khata, muthokose moone yaary’ene ekeekhai. Yaalikanaka n’ikeekhai, mweetteke ni yeeyo. Vano mwiire, “Pwiya, muniveleelihe etthu ekina.” Mukhale murowaka, moone, mukhale murowaka paahi mpakha khula mutthu okuxa opuro awe. Vano munoorowa woona ekereja ya Muluku opacerya okuxa opuro aya. Nto p’ukathi aFilisti anrow’aya otthikela ottuli. Akaputtula anoorowa, maihi animunnuwa, wiitho onoorapihiwa-wo; asikaro anoorimeela. Ti yeeyo. Okathi Ekereja enipacery’aya okela m’Oweryani wiyaya wuulupale, okathi onkhalan’ahu Ananiya ni Safira, ni amosa-amosa wa yaawo. Ayo, mulopwana. Munimoona okathi Ekerej’eyo yoowaarya enkhal’aya vamosa mwa Owerya Wawe, yookhalihā vooপুরoni ntoko aana a Muluku, ookhalihā aana mw’emusini mwa Muluku, Ekereja yoowerya eryeene vale moovuwani mwaya. Oh, eyo t’ile Owo onrweel’awe.

²⁰⁶ Munnoona mootā nry’ahu ottaiwene, axinna? Hata khamunwerya wiiwanana mwaha wa Yoolempwa. Nto khula mutthu, khula mutthu ohinwerya woona opatiiso wa maasi mBibiliani, ni Nsina na Yesu Kristu, owo khanoona wala

yookhala evonyeiye mmuupuweloni. Eyo ekeekhaii. Nto memmo ti muri ekhotto yuulupale.

207 Miyo ki—miyo kinoomuleela mutthu ti mutthu onrowa oruaha Yoolempwa emosa vaavo mutthu ti mutthu onkono awe opatisiwa ni nsina nikina ohiya Nsina na Yesu Kristu, mukereja esya. Wala, vakhala wira owo aapatisiwe enamuna ekina, aahaana opatisiwa-tho ni nsina na Yesu Kristu, wira aakhele Eroho Yowarya. Murwe mukoonihe. Khekhhanle etthu ene eyo. Khokhanle orummwa wene weiwo. Okathi Yesu ohimmy'awe vale, "Murowe, mwaixuttihe maloko othene, mwaapatisaka ni Nsina n'Atithi, Mwaana, ni Eroho Yowarya." Tithi, Mwaana, hata Eroho Yowarya, khanivo hata nimosa nikhhanle nsina, hata nimosa wa yaawo. Petru khurukunuwa, mahiku muloko ohoolo waya, khwira, "Murukunxe murima, mpatisiwe, khula mmosa a nyuwo, ni Nsina na Yesu Kristu, wira muleveleliwe itampi." Ni mapuro othene mBibiliani.

208 Vano nto va yaahikhala atthu kamosa-kamosa yaapatisiwe iwe, enamuna ekina, ni Yohani, wira erukunxe murima paahi. Paulo khwira, "Muhaana opatisiwa-tho. Muhaana orwa-tho."

209 "Oh, masi hiyo nipatisiwe ni mulopwana mmosa muulupale oowaarya, Yohani. Owo t'omupatinse Yesu."

210 "Vaareera, ela ti Ehapari yooreera. Ela Eroho ya Muluku yuupululeliw'aka miyo. Miyo ka murummwa a Apwiya, nto nakhala nlaikha ninrwa nikhumaka Wirimu n'ulaleya etthu ekina. . ."

211 Mukihiye kisome yeeyo. Bibilia ohimmye wira, "Nakhala nlai. . ." Paulo ohimmye wira, "Nlaikha ninkhuma Wirimu nahimyaruru etthu ekina," pixipu, pixipu muulupale, paapa, mulipa-oowehexaxa, onakhaleru etthu p'itthu, "owo alaleya etthu ekina ohiya Yeela miyo yoolalenry'akani, atakhaliwe." Khekhhanle hata. . .Hiyo khanlimalenle itthu siiso. Nnari, mulopwana. Nyuwo paahi. . .Khekhhanle etthu ene yeeyo. Nyuwo, hiyo. . .Vano nto—nto, moone, xeeni atthu ohiweryaka wona yeeyo? Mwaha wa xeeni atthu ohaa—ohaa, ohaaminiki yeeyo? [Ookhala mmutthukumanoni oniira, "Ootthommwa"—Mol.] Munnona? Ookhala olikanyin'he vale, Gene. "Ootthommwa," vekeekhai. Mwaha wa xeeni? "Othene ale Atithi akivahaly'aya ani" (exeeni?) "animoorwa wa Miyo." Moota enlikan'aya! "Othene ale Atithi akivahaly'aya animoorwa, animoorwa wa Miyo." Mulattu aka xeeni, kintthun'aka ophwanyava? Hiyo nri va. Vaareera.

212 Mukihiye kisome eversiikulu ila paahi nto vo kinimooleelani etthu Paulo, itthu si. . .Mutthaka ene yoowo kilalenry'aka ohiy'ula, ela t'ile Paulo ehimmy'awe mwaha wa otthommwa, wa opatiiso wa maasi ni Nsina na Yesu, opatiiso wa Eroho Yowarya, okhalihwiwa mukereja, ni sikina. Va ti vari ele ehimmy'awe.

Vookitikiniha (aahimeeryaka aKalasiya ala) *wira naanaanoru siiso moomuhiya ole owiitthanenleni mwa...mahala a Kristu...* Miyo nkireere wuuliwa muru mwaha wa nyuwo, mwa moolumo makina, wira mwaammuhiya mutthu okela woohihani Yeeyo, *munatthara ihapari sikina:*

Yeeyo ehikhanle ekina; nave arookhala atthu akina anooxankihani, ephavelaka okhootiha ehapari yooreera ya Kristu, okhottiha Ehapari yooreera y'ekeekhai ya Kristu.

²¹³ Masi nwehe. Vano, muupuwele, aari Paulo aamukhanyeranye khula mutthu ahaapatisiwe ni Nsina na Yesu Kristu, wira orwe opatisiwe-tho ni Nsina na Yesu Kristu. Akavi answela wira eyo ekeekhai? Akavi answela wira aari Paulo ohimye wira isiiri iya saaroothiwa okhuma wopattuxiwani w'olumwenku, vano khuupululeliwa yoowo, wira hiyo nroothommwa wira nikhale aana, ni, wira nikhalihiwe aana. Aari Paulo. Nkawehani va etthu ohimmy'awe.

Masi hata nikhalka hiyo, wala nlaikha ninkhuma wirimu, onoolaleeryani ehapari ekina ohiya ele yoolalenryahuni, atakhaliwe.

²¹⁴ Muhiireke paahi, "Miyo nkiniirana ni nyuwo, mwenye." Atakhaliwe paahi. Mukihiye kisome eversiikulu enttharelana.

Ntoko sihimalyaka, kinootthikela ohimya vano, Akhala mutthu onrowa woolaleeryani ehapari yooreera envirikana n'ile hiyo nimanly'ahu waakhela, atakhaliwe.

²¹⁵ Ti yeeyo. Vano, munna mulopwana, muthiyana, vakhala wira aari Muluku nihiku nikina, nto miyo—miyo kinihimya eyo kiroromelaka wira khenikhala ohittitimiha, aakikunxe wira koone ela yaamukhaani... Vano, miyo kinootannyeya; nkinoona wira kinootannyeya, kinikhala ooreerihwa mwaha w'olaleerya. Miyo kinimwiikumihha mmansaka ni wookhalihani vaava mpakha kisuwele wira sihoovolani ikhove ni muhoceya. Masi, oh, miyo...vaakhanle wira nyuwo—vaakhanle wira mwaaniwerya paahi osuwela moota miyo onoothun'akani weiwe! Munnona? Nto okathi miyo, onihimy'aka-tho yeela omosa, okathi miyo...okathi Owo iiraly'awe... Miyo kiirale, "Yaamwiira..."

Owo iirale, "Mwaanitthuna woona ele ekhanle emalelo?"

²¹⁶ Vano miyo khuweha ottuli khwiisoona mmansaka kirupaathale-ene vale voolilini. Vekeekhai nyuwo munnikisuwela okathi woophiyerya wira musuwele wira—wira—wira kinooleelani Ekeekhai. Kintthuna kookoheni etthu emosa, ntoko Samuweli aahimmy'awe awo ehinatthi omuttikitthela makhura Sawuli, kootoko wooleelani etthu mwa Nsina n'Apwiya yahaakhanle ekeekhai? Eyo ekeekhai? Khula okathi enikhalka

ekeekhaii. Kootoko orwa woovekelani musurukhu wala etthu p'itthu siiso? Nnari, moone, nkinatoko. Kootoko wira etthu p'itthu yoohikhala wiilipiha vooloka waka wira kiweettiherenyi wa Kristu? Vekeekhai.

217 Vano awo anthhuna ehimyeke wira ka namasuwela sa mmuruni, moosuwela, namasuwela ootepaxa waakuva. Vekeekhai, itthu iyo sihaana okhumelela, Bibilia ohimmye wira saamukhumelela. Ntoko Yampere ni Yane sanvirikany'aya Moise, awo yiirale etthu emosaru yoohalela olikana n'ile Moise iir'awe, mpakha ophiyererya va wooniheriwa. Eyo ekeekhaii. Masi muupuwele, Yampere ni Yane khayaawerya ovoniha. Awo khayaawerya ovoniha. Awo yaaniwerya oruuha ihasara, masi okumiha nnari. Munnona? Vaareera. Vano, Muluku ti Mpenuxa. Masu a Muluku ankhala Ekeekhaii.

218 Miyo kinneesera okhala naxariya ni nyuwo. Kinneesera wooleelani Ekeekhai. Miyo—Miyo...soovira iyaakha soophiyaka miloko miraru n'imoso, kinneemel'aka vapulpitu va, okathi p'ukathi, iyaakha miloko miraru n'imoso, ni nihiku nimosa khino kinoorowa Woovuwani voohiya epulpitu ila. Iwe onnikhala mwaara, mwaana, tiithi, munna, othene avithiwe iwe, axipatthani ooreerexa. Kinniwehaka ikaxawu saya ni maluwa aheliwe-ene nno. Ni koosuwela wira nihiku nimosa yawaka enookhala, nave. Vano, eyo ekeekhaii. Masi vaxariya-vo, vathi mmurimani mwaka, kinooleelani ni murim'aka wothene, kookupali wira kinoolaleeryakani Ehapari yooreera y'ekeekhai ya Pwiya Yesu Kristu. Kookupali wira mwaahaana opatishiwa, khula mmosa a nyuwo, ni Nsina na Yesu Kristu, ni waakhela opatiiso wa Eroho Yowarya. Vano mwaaairaka vale, enimooruuhelani ohakalala, murettele, ovilela, othunku, oreera murima, wiisumaaliha, ohiviruwa pure, ovilela, waamini.

219 Nto nihiku nlo, etthu yaakikhumelenle voosiis'ule, miyo nkisuwenle. Nnya nkikhanle oohimiyaka sinto kaari vaava v'erutthuni vaka khukhala koonne aka paahi, wala sinto kaarookuxiwa okhuma va, mpakha iwe. Miyo nkisuwenle, nkikhanle oohimiyaka. Etthu emosa ensuwel'aka paahi, wira miyo—miyo kweekwe kaanoova okhwa, nipuro nle naamukhaani na mpunu. Masi kahi woova wira Yesu khaarowa orwa okikuxa, vano, miyo nkoova yeeyo, 'okhala wira miyo—miyo nkoova eyo; masi sinto kaarowa woophwanyani muryeene etthapwe paahi etthapwe yaamukhaani evavaka musulu. Masi kinnoona vano. Okathi waawoonaly'aka atthu ale, awo yaari eekeekhai. Ni yaari atthu yaatonko opatthana ni miyo vathi va, hata amwaar'aka oopacerya. Awo khayaari amwaar'aka, yaari munn'aka. Awo khanakiihaneke iy'aya, yaakiihanne munn'aya oophentiwa. Iwe khisaakhanle mwili mwana, hata miyoonelo ntoko seiyo, khisaakhanle ookhala; yaari yooloka voomalela, waari osiva, waari oloka voomalela.

Miyo kinniikohaka, nkisuwenle, miyo kinniikohaka: Ti yeele awo yoonaly'aya, ehinatthi okhuma elapo ya vathi, okathi waary'aya oxipiritaali iwe, okathi owiihanne aka? Vano awo khwira, "Billy, nyuwo moolaleerya, nyuwo moohimya eyo, masi," awo khwira, "khamunsuwela exeenei iyo." Awo khwira, "Nkinthuna-tho ohala."

²²⁰ Miyo kinniikoha sinto yaari yeeyo, ni mulopwan'ole, a othuknu oowaarya F. F. Bosworth, yoowo eemenle vapulpitu va, yoowo olaleiye ni miyo mapuro oohiyana-hiya mulaponi. Mutokweene F. F. Bosworth, nyuwo othene, kinoona wira, mwaanimusuwela; mulopwana mmosa, a othunku oowaarya. Iwoora piili ohinatthi, ahe, esumana emosa wala piili owo ohinatthi orowa, miyo kaahirowa wa yoowo vano owo aarupaathale ottuli iwe, orowaka, oohalela ophiya iyaakha miloko mithanu na mixexe. Miyoono sawe sikhaani khookowa, muru awe wa ntari ni ipwetupwetu iye sootteele wiitho wawe. Miyo khimukuxa mulopwan'ole mutokweene mmoononi mwaka khukhuwela, "Atithi aka, atithi aka, ikaaro sa wIsarayeli n'anakhavalo aya."

Maana vakhala wira aahinto okhala mulopwana aatonko omooniherya Pentekosite ni aari murummwa eekeekhai, aari F. F. Bosworth, ooreera murima, a xariya, Ehapari yooreera y'ekeekhai, moone, aari Bosworth. Nto okathi omuvarenly'aka mmoononi mwaka, nto khukhuwela, "Atithi aka, atithi aka, ikaaro sa wIsarayeli n'anakhavalo aya."

²²¹ Owo khwira, "Mwan'aka, mukhale vapuwani." Khwira, "Mwaaphwanye amiravo ala kamosa-kamosa mmapuwani wa ilapo s'okhopela, mwawerya vale, awo ehinatthi ophwanya onamathipelela munci-ene iwe. Mwaaroihele Ehapari yooreera eyo y'ekeekhai murin'anyu, mwan'aka." Owo khwira, "Muteko anyu khonapacerye nlelo wa ele onrow'aya okhala." Khwira, "Nyuwo mwa Branham musya." Khwira, "Nyuwo mwa mmiravo, mwan'aka."

Miyo khwira, "Munna Bosworth, kirina iyaakha miloko mixexe ni thanu na tthaaru."

²²² Owo khwira, "Nyuwo khamunapacerye nlelo." Owo khwira, "Muhaahiye alaleyi ala amiravo aPentekosite ephiyaka iwe ni onamukhwa-anepa wunci-ene, n'upahula etthu ene, ni waahela mati—matiplomaata othene nto elapo yothene enavirikanya Yeeyo nyuwo muhinatthi ophiya-wo." Khwira, "Mukelele ohoolo, Munna Branham, mpwahere ni Ehapari yooreera murin'anyu." Owo khwira, "Miyo—miyo kinnaamini wira nyuwo mwa murummwa, ahiiso profeta a Apwiya Muluku ahu."

²²³ Miyo khunweha, khumpatikha mmoononi mwaka. Miyo khwira, "Munna Bosworth, kintthuna kookoheni etthu. Okathi xeeni waari woohakalalaxa wa yawinyu...okathi wa yawinyu...iyaakha sanyu sothene nyuwo mulaleiy'anyu?"

Owo khwira, “Naanaano va, Munna Branham.”

Miyo khwira, “Moosuwela wira munookhwa?”

Owo khwira, “Khivanweryaneya miyo okhwa.”

Miyo khwira, “Exeeni. . . Mwaha wa xeeni ohimya wira ola p’ukathi anyu woohakalalaxa?”

²²⁴ Waahikhala mukhora mukhaani. Owo khwira, “Miyo kirupaathale va ni wiitho waka orukunuwenle-ene mukhor’ole. Minuutu ti minuutu, Ole kimphtaly’aka, ni Ole kimulalenry’aka ni kimweemereny’aka, sothene iya. . . ekumi aka, Owo onimoorwa vamukhora vale mwaha wa miyo, nto miyo kinoorowa ni Yoowo.” Miyo khunweha, kuupuwela, miyo—kaaweha ntoko kaarow’aka omuweha Abrahamu, Isakhi, ni Yakope.

²²⁵ Miyo khukuxa ntata nawe, khwira, “Munna Bosworth, hiyo oowaaaili nimmwaamini Muluku mmosaru, ninaamini ethhu emosaru. Ni mahala a Muluku kinoolaleya mpakha ephumu yookiserya ohiya erutthu aka. Kinookhala oororomeleya wa Muluku ntoko sinsuwel’aka moota w’okhala. Nkinrowa osakaleliha Ehapari yooreera hata epantte wala hata nipuro. Kinookhala oororomeleya ntoko sinwery’aka okhala. Munna Bosworth, kinimoophwanyani Muttethe wooreera weiwo ohinrow’anyu okhala mmiravo. . . ahiiso okhala-tho oowuuluvala, masi mmiravo.”

²²⁶ Owo khwira, “Munookhala weiwe, Munna Branham, muhivelavele.”

²²⁷ Nto ewoora emosa ohinatthi, iwoora piili owo ohinatthi okhwa. . . miyeeri soophiyaka miili ohoolo waya, koono wira owo aamookhwa okathi yoowo nto, amwaar’aka khuvolowa khumoono (owo kweekwe khaareere ooupuwela), vano nto Muhano Bosworth. Nto iwoora soophiyaka piili iira arupaathiki, arupaka. Owo khuvenya, khuweha, nto khutupha voolilini vawe. Owo khwira, “Maama, ahe, nkinwoonani iyaakha sinci-ene! Tithi! Munna Jim, vano,” khwira, “nrowe noone, nyuwo mwaari mmosa w’alipa oorukunxa murima awaka w’Apwiya, oJoliet, Illinois.” Owo aahikhwa saahivira iyaakha miloko mithanu. Munnona? Ayo! Owo khwira, “Nyuwo mwa Munna *Lexe ni lexe*. Ayo, miyo kaaweetihenryeni w’Apwiya o—omuthukumanoni w’oWinnipeg. Ayo. Vano, va ori Munna *Lexe ni lexe*. Nkiniwoonakani. . . Ayo, moone, nyuwo murwiiye w’Apwiya nipuro *khata-khata*.” Nto mwa iwoora piili soottharana owo khuvahana mukhono n’ale owo aaweetiheny’awe w’Apwiya. Khweetta athikelaka voopuroni vawe, nto khummaathi, khwiikimanya matat’awe, nto yaari yeeyo. Munna F. F. Bosworth ookela Muttethe yoole Yesu aakitthunihenry’awe woona ohiyu ule? Vaari siiso, owo ori weiwe mmiravo ohiy’ula. Muluku iitthuuwihe munep’awe. Nto miyo

kikhale oororomeleya saana wira kivolowe Muttetth'ole. Ni wira kikhale mu—murumeyi oororomelaya a Kristu!

228 Miyo kinnuuliwa muru mwaha wa makhalelo aka. Kinnuuliwa muru. Miyo—miyo—miyo... Vakhala wira kinootthekaka ohoolo wanyu nyuwo athu, nyuwo—nyuwo muhaana okirweela khukileela. Munnona? Miyo kinneesa okhala oratteene mwa sothene Muluku onikitthunihery'awe wira ni mahala Awe. Munnona? Munnona? Masi, nwehe, apatthani, nyuwo muhaana wa miyo mwaasuwelaka etthu p'itthu evonyeiyi ni makhalelo aka, murwe mukileele. Nto, nkawehani, kihaana wa nyuwo weemela va ni woolaleeryani Ehapari yooreera. Miyo kihaana wa nyuwo, okhala wira kinwehererya omoona khula mmosa ikhove sanyu, alopwana n'athiyana amiravo, mulapuwaka ekhottiheryo ele iwe. Emumulelo emosa paahi eriyari ya vatthu vary'anyu vano n'iwe. Vano, eyo ekeekhaii. Eri weiwe.


229 Nto Muluku a mahala othene, Muluku a Wirimu, kahi vooveeha, masi voottittimiha, "Paapa," nihiku nle nuulupale nakhala-ru oosuwanyehiwa nno ni okhalana-tho irutthu sahu s'elapo ya vathi, wira niwurye, n'ulya iwuuva ni muhokorokho wa mmuttettheni. "Awo anrowa oteka ipa saya vano khanrowa okhala-mo akina. Awo anrowa ophatteya miri saya s'eviteera vano akina khanrowa olya." Munnona? Mutthu oniphatteya mwiri w'eviteera, mwan'awe t'onkuxa, vano nto mwan'awe t'onkuxa, nto onkhala wawawe. Masi kahi emaar'ela; owo onrowa ophatteya okhale vaavo. Moone, eyo ekeekhaii. Hiyo ninrowa okhala weiwe mahiku othene. Ni wira, Mmuttettheni mme, kimoone khula mmosa a nyuwo.

230 Ni Koosuwela wira mu kinlavula ni arumeyi a oraaru. Nto, axinn'aka, miyo nkinihimya ela—nkinihimya ela wira koosikuliheni. Miyo ka a oraaru, nave, miyo kinnaamini oraaru, mikhalelo miraru sa Muluku (Tithi, Mwaana, ni Eroho Yowarya), masi kahi aMuluku araru. Munnona? Miyo kinnaamini wira siri mikhalelo miraru, vekeekhai, miyo kinaamini iyo ni murim'aka wothe, "Tithi, Mwaana, ni Eroho Yowarya," masi awo kahiyo a Muluku araru. Iyo mikhalelo miraru paah-...wala miteko miraru sa Muluku. Muluku aahitoko okhala mwa Otiithi, Omwaana, nto vano Eroho Yowarya. Ti Muluku mmosaru mwa miteko miraru. Nto awo arina...

231 Nto Tithi, Mwaana, ni Eroho Yowarya, khanihiyo Nsina na Muluku. Muluku orina Nsina nimosa, nto Nsina Nawe ti Yesu. Bibilia ohimye wira, "Emusi Wirimu eniihaniwa Yesu, ni emusi elapo ya vathi eniihaniwa Yesu." Ti yeeyo. Tivo Muluku aarina Nsina nimosa, Nsina n'omutthu. Owo aari... aahikhalana nsina niihaniwa Yehova-jire, Yehova-rafa, iyo saari itiitulu Sawe s'oMuluku. Masi Owo aarina Nsina nimosa, Yesu! Nto owo ti Yoowo.

²³² Nto vakhweeli, axinn'aka, mwaahiiraneke ni miyo, muupuwele, miyo—miyo—miyo kinimoophwanyani iwe, khula enamuna. Munnona? Miyo—miyo kinrowa okhala iwe ni nyuwo. Nto Muluku ooreeriheni. Ni miyo kinnoophentani.

²³³ Ni kintthuna wira ekereja muupuwele vano, Ttiminku voosiisu ninrowa otthikela opacerya vaava ni kinrowa wiilipiha wira kihoopisiheni ovikana ewoora yaneili makaaripi, wira niwerye okhalana muthukumano w'exekuwa, vakhala wira ninoowerya, ni kakhala saana ntoko sikhany'aka ohiy'ula, ewoora ya namuloko ni minuutu miloko miraru. Nyuwo munnikilevelela? Apatthani, hiyo kharina okathi munci-ene ohanle, oophentiwa. Miyo—miyo kiniwiihanani “oophentiwa” okhala wira mwa yaawo. Nyuwo—nyuwo mwa oophentiwa aka. Nyuwo moosuwela? Nrowe...Va enoorwa Yoolempwa emosa. Paulo ohimnye wira, “Kiniwunlelani ehace (Ekereja awe) ntoko siniwunlel'aweni Muluku, okhala wira kinniwaakamelani.” Eyo eri vo, eyo ehiira. Ti yeeyo. “Okhala wira kinniwaakamelani, kinnoovahereryani Kristu ntoko mwali harusi oowiisiinanela.”

²³⁴ Vano, vakhala wira eyo yaari ekeekhai nto nihiku nle, owo iirale...Awo, atthu yaakiirenle wira, yiirale, “Yesu onimoorweelani, nto nyuwo munrowa onooniherya wa Yoowo,” harusi oowiisiinanela. “Alamuliwe ni Masu nyuwo mwaalalenry'anyu.” Nto, nkawehani, vakhala wira kinoolaleeryani siiso ele Paulo olalenry'awe ekereja awe, nikhuru nawe nakelaru awihu anookela nave, 'okhala wira hiyo nrina etthu emosaru. Amen. Nrowe nuuramihe miru sahu vano niiraka, “Muluku ooreeriheni.” Vano...?...pastore ahu oophenteya, Munna Neville. 

OKHALIHIWA AANA 2 EMK60-0518

(Adoption 2)

ETTHARANELO YA MITTHAKA OKHALIHIWA AANA

Mutthak'ola wa Munna William Marrion Branham, opaceryawene olaleeriwe ni Enkelesi Namararu ohiyu, mahiku yeettaka 18 mweeri wa Maio, 1960, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nttaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2020 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org